

四庫全書

史部

欽定四庫全書

山西通志卷一百四十八

寓賢二

朔平府

漢

徐自為太初時以光祿卿出五原塞數百里遠者千餘里築城障立亭至廬昫號光祿塞

蔡邕字伯喈陳留圉人性篤孝母卒廬于冢側少博學

師事太傅胡廣好辭章數術天文妙操音律拜郎中
校書東觀遷議郎奏求正定六經文字靈帝許之邕
乃自書冊於碑使工鐫刻立於太學門外于是後儒
晚學咸取正焉光和元年七月以災異問羣臣邕條
陳七事又特詔問邕災變所由邕因言乳母趙嬈永
樂門史霍王程大人等奸邪宜退太尉張顗等進廷
尉郭禧光祿大夫橋元故太尉劉寵等帝覽而太息
其章為曹節竊視事遂漏露中常侍程璜使人飛章

誣邕請託司徒劉邵議害大臣詔與家屬覓鉗徒朔
方不得以赦令除程璜女夫楊球使客追路刺邕客
感其義皆莫為用球又賂其部主使加毒害所賂者
反以其情戒邕故每得免焉居五原安陽縣邕前在
東觀與盧植韓說等撰補後漢記會遭事流離不及
得成因臨戎長霍園上書自陳奏其所著十意分別
首目連置章左帝嘉其才高會明年大赦乃宥邕還
本郡邕自徙及歸凡九月焉將就還路中常侍王甫

第五原太守智餞之酒酣智起舞屬邕邕不為報智素
貴驕慚于賓客詬邕曰徒敢輕我邕拂衣而去智銜
之密告邕怨於囚放謗訕朝廷內寵惡之邕慮卒不
免乃亡命江海不求仕進後董卓聞邕名高辟之不
就卓怒曰我力能族人邕不得已到周歷三臺拜左
中郎將欲逃去不果及卓被誅王允收邕下廷尉死
獄中

北魏

楊忠弘農華陰人高祖元壽魏初為武川鎮司馬因家
於神武樹類馬忠識量沉深武藝絕倫從獨孤信在
洛遂從魏孝武西遷大統三年又與信自梁俱歸闕
晉爵襄城縣公除雲州刺史兼大都督與怡峯解玉
壁圍尋除都督朔燕顯蔚四州諸軍事朔州刺史朝
廷將經畧漢沔授都督三荆二襄二廣南雍平信隋
江二郢浙十五州諸軍事帥衆南伐攻梁隋郡克之
進圍安陸擒梁將柳仲禮於淙頭安陸竟陵胥降又

擒梁邵陵王綸於汝南盡定漢東地于謹伐江陵忠
為前軍屯江津過其走路周孝閔帝初齊人寇東境
出鎮蒲坂與達奚武迎司馬消難去豫州三十里武
欲還忠獨以千騎趨城下候門開而入及還殿軍後
齊人不敢逼武歎曰達奚武自是天下健兒今日服
矣晉柱國大將軍賜姓普六茹氏武成元年晉封隋
國公保定二年遷大司空三年為元帥伐齊出武川
過故宅祭先人饗將士席卷二十餘鎮破陁嶺突厥

來會四年正月朔攻晉陽班師齊人亦不敢逼是歲
又東伐令忠出沃野以應突厥天和三年卒謚桓子
堅嗣即隋文帝也忠弟整陳留郡公從高祖平齊戰
歿於并州整弟惠大宗伯竟陵縣公惠弟嵩興城郡
公嵩弟達周郡公

元叔仁中山王熙第四子熙為元人所害叔仁以年幼
獲全與母子氏徙朔州孝昌初靈太后詔叔仁歸京
師還其財宅襲先爵河陰之難贈并州刺史

徐遠字彥遐廣寧石門人曾祖定為雲中軍將平朔戍主因家於朔遠少習吏事郡辟功曹未幾與太守率戶赴義旗間習書計為治有恩惠仕至右光祿大夫卒

北齊

暴顯字思祖魏郡斥丘人祖喟魏朔州刺史因家朔邊顯少經軍旅善於騎射曾從魏孝莊帝出獵一日之中手獲禽獸七十三從齊高祖舉義封屯留縣開國

侯晉公齊時仕至車騎大將軍河清二年復除朔州刺史天統元年封定陽王卒

高琛字元寶齊神武弟也少便弓馬有志氣封南趙郡公累遷定州刺史六州大都督甚有聲譽神武入洛以晉陽根本召琛留總相府政事天平中為御史中尉糾彈無所迴避坐後庭事杖遂卒年二十三贈太尉尚書令謚正天平三年又贈假黃鉞左丞相太師錄尚書事進爵為王齊初配享神武廟庭子獻

隋

于仲文字次武周大左輔燕國公實子初仕周以功封
延壽郡公拜柱國隋初累為行軍元帥開皇中率兵
屯馬邑備邊數旬而罷晉王廣奏督晉王軍府事後
突厥犯塞晉王為元帥以仲文為前將軍大破賊而
還大業中進位光祿大夫卒

明

王紱字孟端無錫人博學能歌詩工書寫山水竹石妙

絕一時洪武中坐累戍朔州永樂初用薦以善書供
事文淵閣除中書舍人紆嘗隱九龍山號九龍山人
畫不苟作遊覽時酒酣握筆長廊素壁淋漓沾灑有
投金帛購片楮者輒拂袖起或閉門不納或規之紆
曰丈夫宜審所處輕者如此重者將何以哉蓋其品
似雲林倪氏畫亦雅肖云

解縉江西吉水人謫戍河州過朔遂寓居焉與里人蕭
廣為詩友

朱驥字尚德大興人嗣祖職錦衣衛千戶尚書于謙器之妻以女天順初坐謙累謫戍大同威遠衛憲宗初召復原職後掌衛事兼掌鎮撫司事累晉都指揮使迄明世論典獄之使率以驥稱首弘治三年卒

盧璣浙江松陽人進士成化八年謫戍威遠衛遂於學士多從肄業嘗著通鑑外紀辨正河圖衍義洪範集解

曹邦輔字子忠定陶人嘉靖十一年進士為御史巡視

河東鹽政出為河南副使擒師尚詔擢山西右叅政
累遷右僉都御史巡撫應天倭據陶宅督副使王崇
古圍之倭走太湖追及盡殲其衆趙文華欲攘功而
不得構之乃逮繫謫戍朔州隆慶元年楊博為吏部
起右副都御史累遷南京戶部尚書致仕卒贈太子
少保邦輔歷官四十年家無餘貲詔遣右評事劉叔
龍為營墳墓

寧武府

漢

灌嬰睢陽人販繒以中涓從漢王封穎陰侯七年從擊
韓王信於代至馬邑別降樓煩以北六縣斬代左將
破胡騎將於武泉北復從擊信胡騎晉陽下所將卒
斬胡白題將一人又受詔并將燕趙齊梁楚車騎擊
破胡騎於落石遂至平城從擊陳豨別攻豨將有功
後自滎陽還共立文帝益封三千戶賜金千斤為太
尉三歲為丞相後歲餘卒謚曰懿侯

北魏

源賀河西王禿髮儁檀之子儁檀滅自樂都來奔世祖
素聞其名及見器其機辯謂賀曰卿與朕源同因事
分姓今可為賀氏從擊白龍又討吐京皆先登陷陣
又從征蠕蠕擊五城吐京討蓋吳諸賊皆有功高宗
即位有定策勲封西平王改封隴西累拜太尉蠕蠕
寇邊從駕追討破之督諸軍屯漠南武川顯祖將傳
位徵賀奉璽綬以授高祖又詔都督三道諸軍屯於

漢南是時每歲秋冬遣軍三道並出以備北寇至春
中乃班師賀以勞役京都又非禦邊長計乃上言請
募諸州鎮有武健者三萬人復其徭賦厚加賑卹分
為三部二鎮之間築城城置萬人給彊弩十二牀武
衛三百乘弩一牀給牛六頭武衛一乘給牛二頭多
造馬槍及諸器械使武畧大將二人以鎮撫之冬則
講武春則種植並戍並耕則兵未勞而有盈蓄矣又
於白道南三處立倉運近州鎮租粟以充之足食足

兵以備不虞於宜為使不可歲常舉衆連動京師令
朝廷恒有北顧之慮也事寢不報太和三年薨謚宣
陪葬金陵

宇文拔陵陵鮮卑普回裔孫仕後魏都牧主開府儀
同三司安定忠侯以豪傑徙居代州武川縣傳子系
孫韜曾孫泰徙居晉陽即後周太祖也

唐

史大柰本西特厥特勒入隋為金紫光祿大夫後分其

部於樓煩高祖興太原大柰提其衆隸麾下桑顯和
戰飲馬泉諸軍却大柰以勁騎數百背擊顯和破之
軍遂振授光祿大夫從平長安以功多賞帛五千疋
賜姓史從秦王平薛舉王世充竇建德劉黑闥功殊
等賜侍女三雜采萬段貞觀初擢累左武衛大將軍
檢校豐州都督封竇國公食封戶三百卒贈輔國大
將軍

澤州府

晉

周處字子隱陽羨人少負力馳騁人患之以比蛟虎既而改行見二陸為吳左丞入晉擢御史羌人齊萬年反命率師往討道澤軍行不擾人懷其惠與羌力戰死謚孝侯子圯靖札扶柩權葬周村著有默語及風土記

唐

崔信明青州益都人博聞彊記下筆成章大業中令堯

城實建德招之不屈去隱太行山貞觀中應詔舉終
秦川令

徐彥伯兗州瑕丘人名洪以字顯七歲能為文結廬太
行山下薛元超安撫河北表其賢對策高第調蒲州
司兵叅軍時司戶韋瓘善判司士李亘工書而彥伯
屬辭時稱河東三絕後移蒲州刺史以近畿上南郊
賦一篇辭致典綉歷太子賓客開元二年卒彥伯秉
筆累朝後來翕然慕倣

薛僅字冲用漢御史大夫廣漢後自沛居河七世祖辨
僅拔萃起家開元二十年將巡潞藩擇才能俾宿儲
供以左拾遺為屯留令在任七年乃居於高平山別
業屯留民懷之徐季鴿為撰屯留令薛公善政碑
申環金城郡人咸通間徙陵川縣北之蒲水村養性閒
居無縻爵志卒葬村西陽山下有題其墓者曰可惜
荆山玉沉埋曠野間

張誨其先世居清河祖嘗為和川令因家焉誨復徙居

高平自號拙菴以文學名世專經術富篇韻所交多
一時鴻儒居鄉不苟人胥稱之

宋

李常侍福王之後家隴西成紀縣五代時為澤州守遂
占籍高平善治生勤于農桑與傭奴力作不少懈退
休即讀書鼓琴以修其家學事親處兄弟教子皆盡
其道敦尚行誼遠近慕之五府連辟不就年九十三
卒葬于董寨村

金

王謙并州人後隨母氏至高平愛其山水佳麗遂家焉
少沉靜有志操是非喜怒不形於色受學翰林學士
王晦元經釋典九流七畧咸所精練以子貴封朝列
大夫卜築西山直躬化俗有太邱遺風

明

趙民望浙江人登元末進士第明洪武初自西歸道過
陽城遂僑寓數載博洽淹雅邑壇廟碑碣多出其手

教諭郭輝其門下士也每奉其言以式多士

張洵陝西涇陽人進士因闖亂潛避高平遨遊山谷以嘯咏自適

桂文芳燕山人元時族多權貴明洪武初授沁州學正力學勤訓士人宗之後占籍于沁

蒲州府

周

伯夷 叔齊夷名允字公信齊名知字公達

路史名致字公達

姓墨胎氏夷齊其謚孤竹君之子也父欲立叔齊及
父卒叔齊讓伯夷伯夷曰父命也遂逃去叔齊亦不
肯立而逃之人立其中子於是夷齊間西伯昌善養
老皆往歸焉及西伯薨武王載木主號文王東伐紂
夷齊叩馬而諫左右欲兵之太公曰此義人也扶而
去之武王已平殷亂天下宗周而夷齊恥之隱於首
陽山採薇而食及餓且死作歌其辭曰登彼西山兮
採其薇矣以暴易暴兮不知其非矣遂餓死於首陽

山

猗頓魯之窮士也耕則常饑桑則常寒間朱公富往而問術焉朱公曰子欲速富當畜五特乃適西河大畜牛羊于猗氏之南十年之間其息不可計富擬王公馳名天下以興富於猗氏故曰猗頓

秦

敬教秦河東太守子孫因官家焉

漢

揚雄字子雲蜀郡成都人年四十餘自蜀來至京師大
司馬車騎將軍王音奇其文召以為門下吏薦雄待
詔成帝永始四年三月將祭后土上乃帥羣臣橫大
河湊汾陰既祭行遊介山回安邑顧龍門覽鹽池登
歷觀陟西岳以望八荒迹殷周之墟渺然以思唐虞
之盛雄以為臨川羨魚不如歸而結網還上河東賦
以勸後除為郎給事黃門及王莽篡位雄以耆老久
次轉為大夫天鳳五年卒

馬嚴援兄子永平十五年拜將軍長史將北軍五校士
羽林禁兵三千人屯西河美稷衛護南部聽置司馬
從事牧守謁敬同之將軍敕嚴過武庫祭蚩尤帝親
御阿閣觀其士衆時人榮之年八十二卒

樂恢字伯奇京兆長陵人父親得罪於令收將殺之恢
年十二常俯伏寺門晝夜號泣令即解出親恢長好
經學事博士焦永永為河東太守恢隨之官閉廬精
誦不交人物後永以事被考諸弟子皆以通關被繫

恢獨皦然不污於法遂篤志為名儒徵拜議郎會竇
憲北征數上書諫爭朝廷稱其忠入為尚書僕射竇
太后臨朝恢稱疾乞骸歸鄉里

晉

諸葛京字行宗琅瑯陽都人都護衛將軍瞻子蜀平後
咸熙元年內移河東晉泰始中為郿令入尚書僕射
山濤啟事位至廣州刺史諸葛瑾孫攀子顯亦偕京
內移河東

嵇康字叔夜會稽人遷譙之銍縣僑河內山陽縣竹林七賢之一也魏氏春秋曰司馬文王嘗欲辟嵇康既有絕世之言又從予不善避之河東

北魏

楊順字延伯漢太尉震十二世孫後魏時為冀州刺史封三門縣伯徙居河中永樂五世孫乃元琰也

刁冲渤海饒安人刺史郭祚間其盛名訪以疑義後刺史河東裴桓徵冲為功曹主簿

隋

楊汪字元度弘農華陰人曾祖順徙居河東父琛儀同
三司汪折節勤學專精左氏傳通三禮解褐周冀王
侍讀王曰孤之穆生也其後問禮於沈重受漢書於
劉臻二人推許之曰吾弗如也隋初賜爵平鄉縣伯
歷荊洛二州長史每聽政之暇必延生徒講授時人
稱之為尚書左丞號稱職大業初守大理卿視事二
日上將親省囚徒時繫囚二百餘人汪通宵究審詰

朝而奏曲盡事情一無遺誤上甚嘉之拜國子祭酒
百寮就學通儒碩學論難蜂起皆不能屈上令御史
書其問答奏之省而大悅賜良馬一匹及唐平王世
充以東都用事誅

唐

劉弘基雍州池陽人大業末以右勳侍從征遼東行至
汾陰度已後期遂與同旅屠牛潛諷吏捕繫縣獄事
解亡命至太原會高祖鎮太原遂自結託尤委心太

宗大蒙親禮義兵舉功為第一宋金剛陷太原遣屯
晉州後從屯栢壁率兵二千自隰州趨西河斷賊歸
路及金剛遁弘基率騎邀之至于介休與太宗會追
擊大破之累封任國公改號國永徽元年卒贈并州
都督謚曰襄

宋璟南和人開元五年祠舜蒲坂

徐商字義聲一字秋卿有功五世孫幼隱中條山擢進
士第大中時累拜河中節度使咸通初封東莞縣子

進同平章事以太子太保卒

李商隱字義山懷州河內人英國公世勣之裔孫徙居永樂自號玉溪生嘗云永樂縣所居一草一木無非自栽今春悉已芳茂因書即事一章又所居永樂久旱縣宰祈禱得雨因賦詩又四年冬以退居蒲之永樂渴然有農夫望歲之志遂作憶雪又作殘雪詩各一百言以寄情於遊舊按此三詩匪直流寓直謂之河中府永樂縣人可也又大鹵平後移家到永樂縣

居書懷十韻寄劉韋二前輩注曰二公嘗於此縣寄
居詩曰驅馬遶河干家山照露寒依然五柳在况值
百花殘又曰脫身離虎口移疾就豬肝是商隱避楊
弁太原之亂復居永樂也又戲題樞言草閣詩君家
在河北我家在山西過故府中武威公交城舊莊感
事詩信陵亭館接郊畿幽象遙通晉水祠武威公王
茂元也交城距晉陽九十里所謂脫虎口者當由交
城赴永樂耳商隱工詩豎儷偶語時號三十六體開

成二年進士調弘農尉又試拔萃中選茂元表掌河陽書記得侍御史又為桂管觀察使判官京兆府參軍武寧軍掌書記太學博士劍南東川判官檢校工部員外郎卒於滎陽陸魯望曰玉溪生官不挂朝籍而死蓋未蒞太學任即出成都故海內士深惜之也蕭邁蘭陵人宰相寘子咸通五年進士辟太原從事中和初歷兵部侍郎同平章事累兼尚書左僕射封楚國公襄王僭名邁作冊告辭罷邁為太子太保邁移

疾以弟遽為永樂令往從之僖宗還賜死於永樂
為大臣有峻望逢時不幸不以令終人士惜之

崔愷光啟初太常博士僖宗出幸愷流寓河中

王徽字昭文京兆杜陵人第進士歷拜戶部侍郎同平
章事廣明之亂徽奔赴行在為賊所得迫授偽命不
屈乘間竄之河中遣人間道奉絹表入蜀詔守兵部
尚書充東面宣慰排陣使賊平歷潞州大都督府長
史累遷檢校司空御史大夫知京兆尹事忤權臣罷

使務授太子少師移疾退居蒲州與司空圖遊襄王
煬偽制至河中詔徽赴闕託以風疾不行煬逼內外
臣寮署誓狀徽稱病竟不署名後授吏部尚書進檢
校司空尚書右僕射卒贈太尉謚曰貞

穆行河內人徙家河中第進士知淳化縣考課為一路
最後累官陝西轉運使加直龍圖閣知慶州徙延安
宋

張師德字尚賢襄邑人父去華器之曰此兒必繼吾志

真宗祀汾陰知河南府薛映薦其學行又獻汾陰大禮頌于行在是歲以汾陰禮成恩設科師德舉進士又為第一時人榮之仕至知制誥左諫議大夫卒有

文集十卷

平定州

北魏

信都芳字玉琳河間人好學善天文算數甚為安豐王延明所知延明家有羣書欲抄集五經算事為五經

宗及古今樂事為樂書又聚渾天歌器地動銅鳥漏刻候風諸巧事并圖畫為器準並令芳算之會延明南奔芳乃自撰注後隱於并州樂平之東山太守慕容保樂聞而召之芳不得已而見焉於是保樂弟紹宗薦之於齊獻武王以為中外府田曹叅軍芳性清儉質樸不與物和紹宗給其驪馬不肯乘騎夜遣婢侍以試之芳憤呼毆擊不聽近已狷介自守無求於物後亦注重差勾股復撰史宗仍自注之合數十卷

武定中卒

宋

丹鐸伯牛之後宋太祖克復河東時年穀不登鐸自平
山挈家來孟葦池里居焉後五代丹備丹新等立碑
今葦池里猶存

元

王無咎磁州武安人為昭義軍節度副使金亡不仕徙
樂平築室於邑之秦山以山水自娛號青峯有秦山

小隱圖名公多所題咏

孔克威山東曲阜人孔子五十一代孫元末避亂徙居
樂平建松峯書院塑先師像于中提舉學政給衣巾
以奉祭祀

王遠為叅知政事至正間兵亂避於孟縣五花寨處置
有方人賴以安

明

宋登春趙州人嘉靖間寓居平定州一日醉題李氏書

室壁云窈窕冠山轉參差嘉水流中有結廬者乃是
卧龍儔筆勢有張旭懷素之致

忻州

北魏

乙弗朗家上洛孝莊末避地居并肆間爾朱榮見而重
之後隸賀拔岳封長安縣公卒贈太尉

五代

劉赤塘不知何許人有隱操不求聞達寓白馬山谷中

今名赤塘谷

金

李治字仁卿正定欒城人登金進士第調高陵簿未上
辟知鈞州事壬辰城潰治微服北渡流落忻崞間聚
書環堵人所不堪治處之裕如也世祖在潛邸聞其
賢遣使召之且曰素聞仁卿學優才贍潛德不耀久
欲一見其勿他辭及即位欲處以清要懇求還山治
晚家元氏買田封龍山下而渾源志謂治與元好問

張德輝嘗遊龍山為龍山三老之一今兩存其說

元

王思廉字仲常正定獲鹿人幼師太原元好問既冠張
德耀宣撫河東辟掌書記旋謝歸至元十年董文忠
薦之世祖仁宗朝以翰林學士承旨致仕

代州

周

番吾君趙人趙烈侯謂公仲連賜歌者田公仲稱疾不

朝番吾君自代來謂公仲曰君實好善而未知所持
今公仲相趙於今年亦有進士乎公仲曰未也番
吾君曰牛畜荀欣徐越皆可公仲乃進三人

隋

蘇威字無畏京兆武功人綽之子也周封懷道縣公隋
初封邳國公為納言上幸并州追詣行在所使決民
訟大業初復拜納言進封房公從幸雁門為突厥所
圍上欲輕騎潰圍出威諫曰城守則我有餘力輕騎

則彼之所長萬乘何宜輕脫乃止矣厥俄亦解圍去
駕至太原後諫速還京師為根本計後坐事除名唐
武德初卒

盧太翼字協昭河間人本姓章仇氏博綜羣書尤善占
候算歷之術隱白鹿林慮山茱萸嶺請業者日至後
憚其煩逃於五臺山地多藥物與弟子數人廬於巖
下蕭然絕世以為神仙可致太子勇聞而召之後事
高祖煬帝言無不驗賜姓盧氏卒於洛陽

許善心字務本高陽北新城人初在陳舉秀才對策高
第入隋續成父亨所撰梁史行世大業十一年從幸
雁門為突厥所圍攝左親衛武賁郎將領江南士宿
衛殿省以勲授通議大夫後于江都為宇文化及所
害越王贈左光祿大夫高陽縣公謚曰文節

魏先生宋人也逸其名字于書無所不博隋初太常議
樂如聚訟先生至調律度而金石絲竹各得其所太
常欲薦而官之先生不可受帛二百段而歸歸寓雁

門以帛市酒旦夕歡飲時李密敗黎陽亡命匿雁門先生一見而戲之曰子氣沮而目亂心搖而語偷方今捕蒲山黨得非長者乎密驚起曰既知我能免我否先生曰子非帝王規模又非將帥材畧吾望氣晉汾有異人出能往事之當不失富貴密終不能用其言而敗先生亦竟不知所往

宋

查道字湛然歙州休寧人南唐工部尚書文徽孫幼沉

疑不羣罕言笑喜親筆硯侍母渡江母嘗病思鰕羹
方冬苦寒市之不獲道泣禱于河鑿冰取之得鰕尺
許以饋又刺臂血寫佛經母病尋愈後數年母卒絕
意名宦遊五臺將落髮為僧一夕震雷破柱道坐其
下無怖色寺僧異之咸勸以仕端拱初舉進士高第
後舉賢良方正策入第四等仕至龍圖閣待制卒道
嘗出按部路側有佳棗從者摘以獻道即計直掛錢
于樹而去兒時嘗戲畫地為大第曰此當分贍孤遺

及居都城喜周給嘗夢神人謂曰汝位至正郎壽五十七而享年六十四論者以為積善所延也

許將字冲元福州閩人舉進士第一熙寧中知制誥遼以兵二十萬壓代州境遣使請代地歲聘之使不敢行以命將將入對曰臣備位侍從朝廷大議不容不知萬一北人言及代州事不有以折之則傷國體遂命將詣樞密院閱文書至北境居人跨屋棟聚觀曰看南朝狀元及肆射將先破的遼使蕭禧館客禧果

以代州為問將隨問隨答禧又曰界渠未定顧和好
體重吾且往大國分畫矣將曰此事申飭邊臣豈不
可何以使為禧慚不能對歸報上善之以將直學士
院判兵部時陝西河東弓箭社雖有名籍其多少與
年月不均閱按無法將一切整攝之元祐四年拜尚
書右丞罷紹聖初又拜尚書左丞中書侍郎崇寧元
年進門下侍郎出外卒謚文定

張宗誨字習之司空齊賢第二子少喜學兵法陰陽象

緯之書無不通究齊賢守代州嘗預計畫遂有土鎧
砦繁峙之捷以父任正字後守廊州劉平敗嚴斥候
籍入而禁出使老幼併力守禦之敵引去以秘書監
致仕子請如賀秘監羽衣宗誨曰吾作白頭老監枕
書而眠何以賀老流沙之服為哉時以為名言

滕茂實字秀穎杭州臨安人政和八年進士靖康元年
以工部員外郎假工部侍郎副路允迪出使為金人
所留時茂實兄祐通判代州已先降金尼雅滿素聞茂

實名乃遷之代州又自汴取其弟華實同居以慰其
意欽宗自離汴舊臣無敢候問起居者茂實聞欽宗
將至即自為哀詞具篆宋工部侍郎滕茂實墓九字
取奉使黃幡裹之以授其友人朔寧府司理董詵欽
宗及郊茂實具冠幘迎謁拜伏號泣金人諭之曰國
破主遷所以留公益將大用迫令易服茂實力拒不
從見者墮淚茂實請從舊主俱行金人不許憂憤成
疾卒雲中詵拔歸錄所為哀辭言於張浚上其事贈

龍圖閣直學士臨終詩序茂實奉使亡狀不復反父
母之邦猶當請從主行以全臣節或怒而與之死幸
以所杖節幡裹其尸及有篆字九為刊之石埋於臺
山寺下不必封樹蓋昔年大病夢清涼境界覺而失
病所在恐於此有緣如死窮微則乞骸骨歸悉如前
禱預作哀詞幾於不達方之淵明則不可以庶幾少
游之遺風也中州集茂實留雁門與兄宗正丞福淮
南發運使禕共居久之家人來自汴梁往來并代之

間布衣終身士大夫哀其忠為之起墳於雁門歲時
致祭禱字恐誤當作禱見南申高濟叔碑

元

丁文忠許州鄆城人父貴疾文忠造車一輛兄弟共御
載父禱於五臺河瀆諸祠途遇異僧遺藥而愈

明

吳廷舉字獻臣其先嘉魚人祖戍梧州遂家焉成化末
舉進士繇順德知縣累遷廣東副使發總鎮中官潘

忠二十罪忠亦許廷舉逮繫詔獄劉瑾矯詔枷吏部
前十餘日幾死弟舉人廷弼輒卧其械下刑部主事
宿進曰兩人死我何生奏記張綵乃得釋謫戍雁門
旋赦免累遷南京工部尚書致仕卒廷舉面如削爪
衣敝帶穿不事藻飾家唯書萬卷隆慶中追謚清惠
趙南星字夢白高邑人萬歷二年累遷考功郎中以掌
癸巳京察歸天啟中累遷左都御史奏止廵方提薦
而山西徐揚先河東劉大受踵行如故並劾奏之晉

吏部尚書山西缺廵撫河南布政使郭尚友求之南
星以太常卿謝應祥有清望首列以請既得旨而御
史陳九疇受魏忠賢魏廣微指攻吏科都給事中魏
大中文選郎夏嘉遇南星極言應祥以人望推舉大
中嘉遇無私忠賢矯旨責南星等朋謀結黨放歸張
訥石三畏再劾之謫戍代州嫡母馮氏生母李氏並
哀慟而卒子生三齡怖死南星抵戍所處之怡然莊
烈帝初詔赦還忠賢黨廵撫牟志夔故遲遣之竟卒

於戍所璫敗追贈太子太保謚忠毅

國朝

王席民字安生夷陵州人少補州學生後隸榆林趙氏
籍中趙移官代州叅將引席民自助席民負氣概工
詩布政司叅議清苑陳氏尤契之卒募代州城南演
武塲右陳氏首賦詩以輓富平李因篤立傳秀水朱
彝尊志其墓

李因篤字天生陝西富平人博學工詩文蘭州王刺史

綬嘗刊其秋興詩沈雄蒼鬱騷壇胥推伏焉文亦瞻
整有體格後舉博學鴻詞官翰林院檢討秀水曹司
農溶觀察三晉因篤以故人子從因善代州馮觀察
雲驤雅愛其風土人物居勾注夏屋間者十年

解州

周

范蠡佐越滅吳後浮海至齊變姓名曰鴟夷子皮致產
數千萬齊人聞其賢以為相蠡歎曰居家則致千金

居官則致卿相此布衣之極也久受尊名不祥乃歸
相印盡散其財間行止于陶以為天下之中善為生
自號陶朱公安邑志陶村即其地也

孫臏齊孫武之後嘗與龐涓俱學兵法涓既事魏為惠
王將軍而自以為能不及臏乃陰使召臏至以法刑
斷其足而黥之欲隱勿見臏陰從齊使者還齊威王
問兵法遂以為師後魏與趙攻韓齊使田忌將救之
以臏為師直走大梁臏令齊軍入魏地為十萬竈明

日為五萬竈又明日為三萬竈涓以為怯與輕銳倍
日并行逐之臆度其行暮當至馬陵馬陵道狹而旁
多阻隘可伏兵乃斫大樹白而書之曰龐涓死於此
樹之下令齊軍喜射者萬弩夾道而伏涓夜至斫木
下見白書乃鑽火燭讀之未畢齊軍萬弩俱發魏軍
大亂涓自刎曰遂成豎子之名齊因乘勝盡破魏軍
虜太子申以歸臆以此名顯天下世傳其兵法

漢

薄昭吳郡人文帝之舅初隨帝之代後遷安邑址猶存
賈復字君文南陽冠軍人王莽末為縣掾迎鹽河東會
遇盜賊等比十餘人皆放散其鹽復獨完以還縣縣
中稱其信更始中光武安輯河北復因鄧禹得召見
建武初拜為執金吾十三年定封膠東侯三十年卒
謚曰剛侯

張宗字諸君南陽魯陽人更始以宗為偏將軍宗見更
始政亂因將家屬客安邑及大司徒鄧禹西征定河

東宗詣禹自歸禹間宗素多權謀乃表為偏將軍禹
軍到柁邑赤眉卒至戰却之後遷瑯琊相卒於官

馬武其先南陽人至武寓蒗城光武中興為先鋒力戰
無前退則殿後封陽虛侯

第五倫字伯魚京兆長陵人始以事詣郡尹鮮于褒褒
見而異之署為吏後為鄉嗇夫自以為久官不達遂
將家屬客河東變名姓自稱王伯齊載鹽往來太原
上黨所過輒為蠹除而去陌上號為道士親友故人

莫知其處數年鮮于褒薦之於京兆尹閻興興即召
倫為主簿肅宗初立為司空在位以貞白自稱元和
三年以老病乞身後數年卒年八十餘

蔡倫桂陽人和帝時為中常侍有才學以古書契用竹
簡中古用練帛因取樹膚麻頭敝布魚網造為紙天
下便之嘗寓居安邑今張堇里有墓

楊衆楊震後累遷御史中丞獻帝東還夜走渡河衆率
諸官屬步從至大陽拜侍中建安二年追前功封務

亭侯

唐

蘇頲武功人開元五年祠禹安邑

薛萬徹宅在夏縣南二十五里勲重村今廢門獅二乘
石一尚存按綱目徹燉煌人唐行軍總管屢有重勲
故村以此得名土人掘得碣石鐫巴陵公孫薛貞筠上
柱國丞知左都騎上柱國德獎德滿騎都尉德貞左驍
騎尉元簡上騎都尉元封元亨元裕元景元高皆其

苗裔也今墓在大張村廟在蛾眉嶺

元

博多納西域巴剌勒哈城人元兵下西域舉族歸事親王
實哩授河東民賦副總管因居河中猗氏縣徙解州
卒贈榮祿大夫宣徽使柱國芮國公子察罕生於河
中其夜天氣清肅月白如畫相者賀曰是兒必貴國
人謂白為察罕故名察罕察罕天性孝友田宅之在
河中者悉分與諸昆弟昆弟貧來歸者復分與田宅

奴婢縱奴為民者甚衆故人多稱長者皇慶元年進
榮祿大夫平章政事商議中書省事乞歸解州立碑
先塋許之

張楨字約中汴人至正二十一年僉山南道肅政廉訪
司事上言額森布哈托克托特穆爾諾爾奉使大同遷延
退縮之罪不報即辭去居河中安邑山谷間結茅僅
容膝有訪之者不復言時事二十四年太子出居冀
寧奏除贊善又除翰林學士皆不起庫庫特穆爾將

輔皇太子入討博羅特穆爾遣使傳皇太子令賜以
上尊且訪時事楨復書大要以保君父扶社稷衛生
靈為言且舉沙邱靈武故事為戒庫庫特穆爾深納
其說後三年卒

鄧中立以丞相左遷運使因老疾寄籍於安邑

歸暘字彥溫汴梁人至正十八年以集賢學士資德大
夫致仕僑居弘州後徙蔚州又徙宣德皆間闕避兵
尋抵大同及闕陝小寧來居解之夏縣太子出冀寧

強起之居數月復還夏縣至正二十七年卒

明

張謙山東臨朐人邃於理學洪武初慕歸賜名來夏縣以薦授儒學教諭士子雲集比卒弟子慕其道義如哭私親為買地葬之

廖俊江西新淦人進士正德間以工部郎中陞運司同知俊居官廉貧不能歸遂寄籍焉有河東漫興集行於世

絳州

上古

雲陽先生遁甲開山圖絳北陽石山有神龍池黃帝時
遣雲陽先生養龍於此

晉

卜珣字子玉後部人少好讀易郭璞見而歎曰吾所弗
如也珣隱於龍門山劉元海徵為大司農侍中固以
疾辭元海曰人各有心卜珣之不欲在吾朝何異高

祖四公哉可遂其高志後攻晉陽被殺

北魏

元徽大司馬城陽王孝昌中爾朱榮殺害朝士徽以正
平郡高梁楊擲豪俠有志氣避難投擲擲藏而免之
孝莊帝立徽乃出復為司州牧

隋

王孝逸陳留人文中子先達也文中子十五為人師孝
逸白首北面文中子遊孔子廟出而歌曰大哉乎其

與太極合德神道並行乎孝逸曰夫子之道豈少是
乎文中子曰子未三復白圭乎孝逸再拜謝之終身
不敢臧否文中子問諸生何樂孝逸曰樂聞過文中
子曰過而屢聞益矣又嘗許孝逸暨程元之文云
姚義字仲由受禮于文中子門人問孔庭之法曰詩曰
禮不及四經何也義詳論其旨文中子間之曰姚子
得之矣義困于窶房玄齡曰傷哉窶也盍請乎義曰
古之人為人請猶以為捨讓也況為已乎吾不願文

中子聞之曰確哉義也實行古之道矣有以發我也
難進易退文中子嘗謂義能交或曰簡曰簡而不傲
所以為能也或曰廣曰廣而不濫又所以為能也又
嘗謂義可與友久要不忘又嘗論及門曰義也清而
莊又曰姚之辨而王績北山賦亦曰姚仲由之正色
凌敬學于文中子文中子謂敬暨賈瓊王孝逸曰諸生
何樂曰樂逢善人文中子曰多賢不亦樂乎敬問
禮樂之本文中子曰無邪敬退文中子曰賢哉儒也

以禮樂為問

董常字履常河南人受學于文中子備聞六經之義文中子觀田常偕魏徵杜淹至文中子曰各言志乎徵曰願事明王進思盡忠退思補過淹曰願執明王之法使天下無冤人常曰願聖人之道行于時常也無事于出處文中子曰大哉吾與常也文中子嘗謂慎密不出董常能之又謂董常可與出處介如也又謂董常幾于道可使變理又謂董常時有慮焉其餘則

動靜慮矣文中子謂程元曰汝與董常何如元曰不敢企常也遺道德元也志仁義文中子曰常則然矣而汝於仁義未數數然也其於彼有所至乎繁師元聞常賢問賈瓊以齒瓊曰始冠矣師元曰吁其幼達也及常卒文中子哭于寢門之外拜而受弔赴洛唁其家饑困于澠池行不輟先是常見文中子歎曰善乎顏子之心也三月不違仁矣文中子聞之曰仁亦不遠姑慮而行之爾無苟羨焉惟精惟一誠先登于

岸常出曰慮不及精思不及睿焉能無咎焉能不違
此學成文中子曰常也其殆坐忘乎靜不證理而足
用焉思則或妙或問曰董常何人也文中子曰其動
也權其靜也至其顏氏之流乎常嘗問古者明而不
視聰而不聞有是夫文中子曰又有圓而不同方而
不礙直而不抵曲而不佞者矣常曰濁而不穢清而
不皎剛而和柔而毅可乎文中子曰出而不聲隱而
不沒用之則成捨之則全吾與爾有矣竇威嘗問曰

大哉易之盡性也門人孰至焉文中子曰董常近之
蓋常行幾顏氏而尤深于易隋季文中子之教行於
河汾門人自遠而至咸稱師北面受王佐之道千餘
人而常為之冠阮逸註稱亞聖云

仇璋為龍門關吏文中子之韓城自龍門關先濟賈瓊
程元後璋止之曰先濟者為誰吾視其顏顏如也重
而不亢目燦如也澈而不瞬口敦如也闕而不張鳳
頸龜背鬚垂至腰參如也與之行俯然而色卑與之

言泛然而後應浪鷲施旋而不懼是必有異人者也
元曰子知人矣是王通者也瓊曰吾二人師之而不
能去也璋曰夫杖一德乘五常扶三才控六藝吾安
得後而不往哉遂捨職從于韓城備間六經之義文
中子謂賈瓊曰君子哉仇璋也比董常則不足方薛
叔則有餘璋亦早卒至今推河汾之學者董仇薛程
張元素受學于文中子問禮文中子曰直爾心儼爾形
動思恭靜思正問道文中子曰禮得而道存矣元素

出文中子曰有心乎禮也夫禮有竊之而成名者況躬親哉

竇威字文蔚岐州平陸人隋太傅熾子受禮于文中子
竇氏世貴獨威尚文諸兄詆為書癡舉秀異不屑調
學益博文中子嘗謂世羨富貴竇威能之又謂威也
和而博或問威與董常何如文中子曰不知後威仕
唐至內史令謚清

賈瓊中山人受禮于文中子又嘗習書至桓榮之命文

中子問諸生何樂瓊曰樂閒居文中子曰靜以思道
可矣及瓊為吏事楚公將行文中子餞之瓊曰願聞
事人之道文中子曰遠而無介就而無諂汎乎利而
諷之無鬪其捷瓊曰終身誦之文中子曰終身行之
可也瓊因讒而歸以告文中子文中子曰瓊汝將閑
門却掃與不如緘口而內修也後楚公作難瓊可謂
立不易方矣瓊進問曰敢問死生有命富貴在天何
謂也文中子曰名之在前命之在後斯自取也庸非

命乎噫吾末如之何也已矣瓊拜而出謂程元曰吾
今而後知元命可作多福可求矣程元曰敬佩玉音
服之無數文中子嘗謂賈瓊可與行事臨難不變又
謂瓊也敏而毅而又嘗許賈瓊魏徵之正云

繁師元受學于文中子將著北齊錄以告文中子曰無
苟作也又問稽古之利文中子曰執古以御今之有
乎而又嘗問董常賢亟問于賈瓊云

唐

房喬字玄齡清河人吏部侍郎彥謙子年十八第進士
為隰城尉受書于文中子嘗問善則稱君過則稱己
可謂忠乎文中子曰讓矣及推論門人嘗謂玄齡志
而密偕魏徵輩逢其時不減卿相而禮樂則未備也
喬慨然有憂天下志後仕唐至司空時稱玄齡善謀
謚文昭

杜如晦杜陵人受樂于文中子問政文中子曰推爾誠
舉爾類賞一以勸百罰一以懲衆夫為政而何有如

晦出謂竇威曰謹人容其訐佞人杜其漸賞罰在其
中吾知乎為政矣文中子嘗曰杜如晦若逢明王於
萬民其猶天乎董常房玄齡賈瓊問曰何謂也文中
子曰春生之夏長之秋成之冬斂之父得其為父子
得其為子君得其為君臣得其為臣萬類咸宜百姓
日用而不知者杜氏之任不謂其猶天乎吾察之久
矣目光恍然心神惏然此其識時運者憂不逢時以
然哉後仕唐至右僕射時謂如晦善斷謚成

魏徵字元成魏州曲城人棄質產不營受書于文中子
通貫書術嘗誦書惠迪吉及詩萬福來求文中子曰
徵其能自取矣徵嘗宿文中子之家言六經踰月不
出及去謂薛收曰夫子之生是三才九疇屬希衣也
文中子嘗謂處貧賤不懾魏徵能之又謂面譽而背
毀魏徵惡之及推論門人謂徵也直而遂又謂魏徵
之正又嘗特嘉之曰徵顏冉之器也後仕唐至侍中
謚文貞王績嘗遺人書猶曰吾家魏學士云

杜淹字執禮杜陵人隋時隱太白山來學于文中子受書焉文中子嘗謂淹也誠而厲後歸唐房喬亟白秦王引為文學館學士仕至御史大夫謚襄

李靖本名藥師三原人舅垣人韓擒虎伏其善論兵受詩于文中子嘗謂李靖之智又謂李靖智勝仁摧論門人則謂靖也惠而斷後仕唐至平章政事謚景武岑參南陽人文本之後天寶三年進士嘗僑王屋有南池夜宿思王屋青蘿舊齋詩又題平陽郡汾橋邊柳

樹注參曹居此郡八九年參每詩一篇出人競傳寫
柳鎮奉母避亂於王屋山後徙吳鎮宗元父也

郭晞子儀第三子常從父征伐以功歷鴻臚卿河中軍
亂殺節度使李國貞荔非元禮詔以子儀為河東關
內副元帥鎮絳州時四方多逐戎帥子儀至絳誅其
元惡其黨頗不自安欲謀翻變晞知其謀選親兵四
千伏甲以防之常持弓警夜不寐者七十日叛將竟
不敢發以功拜侍中監累遷太子賓客封趙國公

宋

趙延京師人為學修潔端已不恥菲薄後定居于絳之
稷邑

元

特烈奈曼人居絳州祖拜布哈為宗王巴圖王傳特烈
魁偉寡言有謀畧早歲宿衛王府巴圖分地在平陽
以特烈監隰州中統初調平陽馬步站達魯噶齊至
元初宗王海都叛特烈始終四往返歷十四年上嘗

勅所受海都皮服二襲全飾以金朝會服之以表示
焉又謂特烈曰朝官之要重者惟汝所擇對曰臣志
在王室其事未辦不敢奉命令臣母在絳州老且病
得侍朝夕幸也詔從其請授絳州達魯噶齊十五年
平陽李二謀亂捕問之盡得其狀中書奏進秩上曰
鐵連豈惟能辦此耶加宣武將軍十八年卒於官年
六十四子達哩岱嗣官信武將軍同知大同路達魯
噶齊

明

閻禹錫洛陽人徒步從薛瑄學及別瑄送之里門謂曰
程門教人以居敬窮理為要汝歸勉之禹錫取朱子
文集語類諸書掇取其精實者題曰晦菴要語瑄卒
禹錫撰行述

楊進道河內人從薛瑄學洪熙元年瑄父教諭卒於河
內瑄往榮陽治裝為旋葬計進道徒步相從時秋雨
積潦生泥行三十里水行十餘里畧無愠色後瑄如

京師又有與進道書

賈昭薛瑄門人瑄自河內扶父教諭樞歸里昭與楊進道送至孟津灑淚而別後瑄有祭昭文畧曰昔遊覃懷交契最密德言相酬經義與析

白良輔洛陽人從薛瑄學或問瑄閭禹錫白良輔二人何如瑄曰洛陽似此二人也難得良輔贊瑄曰太極之實不過仁義中正而已欲知先生當觀之於太極可也

陳銓父名原字復初薛瑄自河內扶父教諭樞至覃懷
原遣其子及二門人數百里外來弔人以郭林宗徐
孺子之事稱之後遣銓受學瑄門

張鼎薛瑄門人撰瑄年譜其稱瑄曰剛方正大不詭隨
不屈撓講論經書窮究義理自身心推之萬事萬物
然後約之以歸於一其餘子史百家靡不淹貫究竟
至極周易太極圖西銘近思錄未嘗釋手嘗瞑目端
坐思嘗有得欣然見於顏面其學蓋已至於樂地矣

吉州

明

徐賁字幼文其先蜀人繇毘陵徙吳時稱十才子賁其一也工詩善畫山水避淮張徙居吳興蜀山洪武七年用薦起家丙辰二月遣廉訪晉冀簡其索惟紀行詩數首授給事中後為河南左布政使以缺洮岷軍犒勞逮繫卒詩名北郭集其晉冀紀行詩乃廉訪時作也

隰州

明

陳敏交趾國清化府永寧人宣德十年由監生除永和訓導九年考滿陞本學教諭以年老請告遵例占籍永和仍帶原俸終其身敏學修行優師道尊嚴雅懷高趣所至輒有題咏士林稱之

山西通志卷一百四十八

欽定四庫全書

史部

山西通志卷一百四十九

詳校官給事中臣王鍾健

檢討臣德生覆勘

總校官進士臣朱鈐

校對官庶吉士臣吳裕德

謄錄監生臣湯師錫

欽定四庫全書

山西通志卷一百四十九

列女

自漢劉向著列女傳而載二妃之事尤詳嗣後亦多
續傳至宋曾鞏序向著書之義尤精以粹朱子嘗亟
稱之三晉古多淑媛又多節烈女業已傳芳竹素矣
至

昭代風化彌隆恒

詔旌之以示勸視古烏頭棹楔之制尤為優渥焉綜厥
嫩行夫亦以推闡西京子政北宋子固之訓指也志

列女

太原府

陽曲縣

魏

許允妻阮氏阮衛尉女奇醜交禮竟允無復入理家人
深以為憂會允有客至婦令婢視之還答曰桓郎桓

郎者桓範也婦云無憂桓必勸入桓果語許曰阮家
既嫁醜女與卿故當有意卿宜察之許便回入內既
見婦即欲出婦料其此出無復入理便捉裾停之許
固謂曰婦有四德卿其有幾婦曰新婦所乏惟容耳
然士有百行君其有幾許曰皆備婦曰夫百行以德
為首君好色不好德何謂皆備允有慚色遂相敬重
允為吏部郎多用其鄉里魏明帝遣虎賁收之其婦
出誠允曰明主可以理奪難以情求既至允以實對

釋之初允被收舉家號哭阮自若曰勿憂尋還作粟
粥待頃之允至後為司馬師所殺門生走入告其婦
婦正在機中神色不變曰早知爾爾門人欲藏其兒
婦曰無預諸兒事阮徙居墓所師遣鍾會看之若才
流及父當收之兒以咨母母曰汝等雖佳才具不多
率胸懷與語便無所憂不須極哀會止便止又可少
問朝事兒從之會以狀對卒免

晉

王渾妻鍾氏字琰潁川人魏太傅繇曾孫也父徵黃門
郎琰數歲能屬文及長聰慧弘雅博覽記籍美容止
善嘯詠禮儀法度為中表所則琰女亦有才淑為求
賢夫時有兵家子甚俊琰子濟欲與之白琰琰曰要
令我見之濟令此兵與羣小雜處琰自幃中察之既
而謂濟曰緋衣者非汝所拔乎濟曰是琰曰此人才
足拔萃然地寒壽促不足展其器用不可與婚遂止
其人數年果亡琰明鑒遠識皆此類也

郝氏王汝南湛婦汝南少無婚自求郝普女司空以其
癡會無婚處任其意便許之既婚果有令姿淑德生
東海遂為王氏母儀或問汝南何以知之曰嘗見井
上取水舉動容止不失常未嘗忤觀以此知之

北魏

辛少雍妻王氏有德義少雍與從弟懷仁兄弟同居懷
仁等事之甚謹閨門禮讓人無間言士大夫以此稱
美

唐

盧姨狄梁公之為相也有盧氏堂姨居于午橋南別墅
盧有一子狄曰某今為相表弟有何所欲願悉圖之
婦曰老身止有此子不欲其事女主狄大慚而退

五代

劉氏李國昌妻天復元年朱全忠自將攻李克用其將
氏叔琮朱友寧累破晉軍圍太原克用大恐李存信
請奔北蕃劉氏謂克用曰聞王欲委城入蕃審乎計

誰出曰存信等為此劉曰彼牧羊奴安辦遠計王常
笑王行瑜失城走而死若何做之且王頃居達靼危
不免必一朝棄此禍不旋踵克用悟乃止居數日散
士復集夜襲友寧營汴人引去

元

申氏冀寧李弘益妻至正二十年賊陷冀寧申語其夫
曰君當速去勿以我相累若賊入吾室必以妾故害
及君矣言訖投井死弘益既免於難再娶安氏居二

歲而弘益卒安時年三十泣謂諸親曰女子一適人
終身不改不幸夫死雖生亦何益乃竊入寢室膏沐
薰裳自縊於柩側

明

李雄妻王氏雄為太原左衛百戶洪武間歿於陣時氏
年十九聞訃哀號欲絕撫孤興守節歷五十餘年士
夫扁其門曰忠節

賈文遠妻楊氏夫亡事親撫孤志行無玷鄉曲賢之洪

武間旌表

董榮妻郝氏少寡守節終身不渝宣德五年旌表

董三漢妻馮氏年二十一夫歿守節三十餘年宣德間

旌曰貞節之門

胡源妻朱氏年二十一夫亡奉姑撫子守節二十五年

正統六年旌表

趙氏字慧寶太原右衛人適府庠生蘭景昌侍疾湯藥
必親嘗祈以身代俄而景昌卒遂自縊於其側年

方十八殯日二柩並衢而行見者為出涕成化初旌表

羅氏太原左衛中所千戶張斌妾年二十生子鑑纔八月斌卒羅清操自勵訓鑑有成

鄒鑑妻董氏名貞歸鑑期年生子溥而鑑卒董四日不食決志殉夫所親勸之曰從夫義也捨舅姑棄邈孤其如孝慈何氏心動始進食既殯終身縞素紡績以自給為溥娶婦王氏生子慶末期溥卒王年二十有

一守節如姑士夫扁曰鄒門雙節

張永相妻王氏少師恭襄公妹少聰慧嗜讀書及笄適永相恂絕類貧家子未抱子勸相納妾韓氏生子多疾王親撫之五歲尚口哺及相卒延師教之王熟於尚書每口授以廣其業脫簪珥為市書御史魏希相撰文以頌其賢

李氏推官韓彰之繼妻彰先娶張生子紹繼娶氏生子紘氏慈惠遇紹有恩凡衣服飲食常加於紘紘見愜

氏叱曰而有母彼無母而欲使我作蘆絮婦耶繼母之賢古今罕儷後紘登甲第兩典州郡咸謂母氏之報云

庠生王相妻武氏相亡欲自盡念三子俱幼無所依忍死撫孤歷五十餘年後子佐封河南道御史孫立賢太僕寺卿曾孫元雅遵化巡撫子孫繩繩門祚熾昌皆氏之遺澤也

張鐵妻臧氏年二十三夫亡矢殉家人慰勉之弗聽乘

間自縊死

鄭氏字淑英頗讀書幼時聞其父鑑談節義事輒曰是
在人自盡耳長適太原前衛百戶陳義義戍於邊卒
喪歸啟棺浴而殮之痛絕而甦者數四勺水不入口
曰吾前已約吾夫矣死則同歸不忍背也遂自縊於
室

郭憲妻王氏嘉靖間北兵入犯氏被掠不屈遂遇害憲
繼娶牛氏憲亡矢死散遺賫於親族不食十有四日

而絕

王天倫妻鄭氏年二十三天倫亡遺幼孤二天倫弟妻
朱氏亦寡相依五十年奉姑撫幼舉無違禮巡按黃
疏表其雙節

生員郭應元妻彭氏通列女傳工書夫亡無子苦節以
終

張棟妻劉氏年二十棟故氏哀毀盡情喪葬盡禮育二
孤成立享壽終

千戶潘政妻施事寧化所人寓居陽曲政亡氏年少子
幼甘貧守志子姓四世同居氏親為撫訓孫高登進
士歷官陝布政司參議

襲千戶潘潤妻王氏年十九潤卒讓厚產甘澹薄孀居
三十餘載題請旌表

蘭州知州李鈞妻郭氏鈞故氏年二十泣曰死易立孤
難吾勉為其難者撫子天資娶婦張氏方有娠天資
復卒妊男甫歲張氏亦亡氏百方呵保撫幼孫有成

朱知鰥妻杜氏通判纘宇女也知鰥家酷貧相得懽然
年十九生一女知鰥卒盡鬻衣物以殮既畢潛自縊
姑救免孀居三十餘載勤十指以養姑內外稱之
錢謙益妻趙氏夫亡子在襁褓立志撫孤利用冲齡食
餽卓然自立學使給扁獎之

生員劉一龍妻張氏年二十三夫亡食貧課子艱苦萬
狀子芝讀書樹立以選貢任彰德府通判

羅江四妻趙氏江四早逝守節撫孤五十餘年享壽八

十餘歲

秦世登妻張氏年十九有一女秦卒矢死不二守節六十餘年題請旌表

秦世賢妻吳氏夫亡誓不他適貧無以自給氏通儒書及內典課甥與姪寄食以終老

李維翰妻胡氏翰任陝西布政司理問卒於官氏扶柩歸葬時有遺腹祝曰願天畀一子以延夫祀已果得男芳桂或以子幼不保勸之改適氏正色拒之課子

誦讀登賢書官學博尚美中傳其事

李氏太原縣人舉人中馥女適生員傅襄襄邁疾氏廢寢食期以死從襄卒家人防甚力氏陰懷杏仁吞之即日死知縣范士楫表其節烈

參將朱國昌妻陳氏早寡守志拮据課子萬壽後登乙酉鄉薦

舉人劉世遠妻張氏夫卒盟心守節育子成立邑令請旌

崔九德妻高氏嫠居四十六載境彌苦節彌堅事聞旌表

張彥明妻劉氏夫早歿無子女有富室願娶之氏不從其兄勸之氏厲聲曰本望成我志而反出此言耶遂與之絕值歲屢歉窘甚日號泣隣媼疑其有悔心微諷之氏曰志豈有他自恨生不與夫同斃耳卒年八十餘

庠生陳見妻孔氏孀居二十載冰操皦然甲申閭賊破

太原掠其家氏罵不絕口遂遇害媳朱氏孫性福孫
女長姐俱赴井死

生員裴潤妻范氏夫故悲慟欲自盡遺子希度方五齡
四女抱之環泣日夜哀請意少解課子登進士授堂
邑令每出聽政則誨以省刑卹民潔已報國秩滿封
太孺人癸未以母節聞有旨建坊未及行闖逼太原
氏抱幼孫避北城別墅城陷囑幼孫於老僕投井死
之

郝堯宰妻柴氏夫死守節值閭寇逼城氏匿地窖中讐家楊姓者引賊入氏恐被汚以鐵器自擊其額流血蔽體昏絕於地賊舍之不食三日死

王紘妻陳氏紘歿子甫五歲姑樊氏哭紘幾不欲生氏忍痛解慰曰吾誓奉姑終身以撫此子也姑得不死家無餘貲業蠶織以為事育需歷十五載子遊庠姑尋歿氏曰吾事已畢可以下報先人矣值閭賊破城不食死

蒲縣知縣朱新甄妻張氏逆闖陷城氏被執給賊同婢
取貲財氏乘間投井死

孝廉朱萬壽妻於氏闖陷太原偕羣婦走匿夾牆氏失
後衆以為必獲於賊矣及賊退得尸井中兩脇有刀
痕寸許裏衣繩縛數匝見者嘆為真烈婦

靜海知縣崔嗣遠妻黃氏賊攻城亟率子婦於氏女崔
氏孫女全姐侍女春玉同一井死

李廷佐妻萬氏早孀已歷二十餘載城破知不免攜甥

女酉姐死於南社村井

昭信校尉李時春妻任氏守節四十餘年年八十一歲
闖賊入城盡驅百姓曰清街氏於紅四牌樓罵賊觸
石死

舉人李桂芳妻朱氏城陷投井死幼女侍婢皆從之
生員聶輝妻李氏闖寇逼投井水淺不得死寇欲出之
以頭濡水死

武職妻程氏闖破城自縊死其姪女投井死

生員秦謙妻康氏聞閹賊陷城語夫曰脫被辱何顏見
君登樓自勒死

宗室朱慎錄妻郝氏貢士侯三接妻高氏生員萬福德
妻周氏逆閹陷城俱投井死

劉源妻楊氏馬應龍妻李氏崔九德妻高氏藁城知縣
劉世遠妻張氏俱守志節

國朝

庠生楊芳聲妻任氏年二十九夫故氏以婦代子以母

兼師其他喪葬祭祀胥動無違禮孀居七十一載壽躋百齡康熙五十九年疏請建坊

賜貞壽扁額孫廷詔成雍正甲辰武進士

尚見帝妻趙氏于歸八載尚歿氏哀慟矢死翁姑諭之曰與從死孰與撫孤孤成夫不死矣氏領之勤苦操作歷五十六年課子浩領丁卯武鄉薦雍正五年具疏旌表

庠生畢景徵妻張氏夫亡遺子甫二歲氏守節撫孤歷

四十年如一日士論賢之

陳功妻秦氏功甲申殉難家徒壁立氏隻身操作仰事俯育無不盡孝極慈苦節二十餘年而逝

太原左衛甯守愚妻張氏年二十三守愚故氏事孀姑育幼子內外稱賢季子纘宗以諸生從征姜瓖授餘干知縣氏封太孺人

李貞妻韓氏年二十二夫卒家素貧或勸改適韓誓不二天女紅自給壽七十六歲終

尹承忠妻凌氏夫亡守節課子有成

成仕妻馬氏布政馬諫女年十七仕亡無子女諫勗以
守志立幼姪其昌為嗣氏克遵父訓終始弗渝壽八
十二而終

郭應選妻張氏選失足墜井死氏年十九父母令改適
氏曰夫死不忍獨生徒以翁姑與藐孤耳奚言嫁耶
子甫成又卒復撫三孫備嘗艱苦壽八十餘卒

白明妻郭氏年二十餘而寡督耕撫子性好施予有餘

率賙貧乏守節五十餘載卒

庠生張士美妻於氏年十九士美卒父母憐其少欲奪而嫁之氏斷髮矢志尋卧病卒衆請立節婦碑以表之

王民皞妻張氏民皞病篤以老親稚子為囑氏指天矢志民皞亡事舅姑以孝課二子讀書成立

孟孫蕙妻楊氏年十八夫亡無子欲以死殉姑慰止之尋以哀毀成疾其父延醫視之辭曰死分也固晚矣

卒不受醫邑令戴夢熊旌其門

庠生邢惟恒妻楊氏年十八夫亡孝事姑嫜撫子有成

歷二十餘年卒

縣志作蔚氏

太原縣

元

武烈女名管嬰年十七未嫁至正間避兵山洞其父被執女奔至父所請以身代衆乃釋其父父逃去始言井邊有瘞金衆掘得爭取之女即投井死後人名其

井曰烈女井

白氏太原人夫棄家為僧白年二十留養姑不去服勤
織絰以供租賦夫一日還迫使他適白斷髮不從夫
不能奪乃去姑年九十卒竭力營葬肖姑像祀之終
身

韓孝女暨父崗母高氏母死女日夕號泣父亦哭而喪
明醫曰人舌銍之可愈女忍慟為銍眼果復明人稱
孝女

明

楊素妻劉氏劉彥明長女年十七適楊越八年素疾謂
劉曰吾固不起第親老子幼家貧無倚可奈何劉號
泣拔髮誓不有負夫歿晝夜紡績以充奉養比姑以
天年終喪葬盡禮撫三子皆成景泰初旌表其門
生員喬黎獻妻王氏年二十生子儒閔八月獻卒氏痛
絕而甦以子幼不即死撫守有成巡按陳豪給扁旌
表

生員段廷舉妻程氏夫逝年二十生子甫月餘守節撫孤歷五十年哀慕如一日

李文傑妻梁氏嘉靖間遇兵於羅城以刃脅之氏曰殺即殺耳不汝從也兵怒斬其首血濺尺餘屍行數步而仆又李永岡妻姜氏同時被執亦以不屈死

生員張朝宰妻高氏年二十四而寡矢志不二撫子有成巡按趙旌其門

楊春妻王氏夫故年甫十九孝事舅姑慈育幼子有司

旌其門

千戶王貞吉妻方氏封宜人年十八貞吉卒守節弗渝
學使周奉詔旌云失天早歲矢志終身至子女之靡
遺知形影之寂寞引刀而寢富室之謀讓產而甘薄
田之入婦德克備旌典宜膺

趙氏趙維新女適陽曲羅繼武子羅初娶婦時曾貸匪
人金約與私之既娶入門匪人先匿氏寢氏知痛舐
姑強亦不納乃誣以他詞訴於官稍繩以法氏赧顏

不自白退而匪人逼如故氏斷髮垢面甘蹈白刃死
知縣金烈其事弔拜繫匪人罪之

孫印妻李氏高唐知州李希孟女通書史能詩歸孫二
載而寡家人欲奪而嫁之氏哭告姑曰從一而終義
也婦勿敢二引柏舟以自況其哭夫詩云風吹針雨
點紗窓天送亡人淚幾行此處不堪腸盡斷殘軀脉
脉度年光又弔節婦邵氏詩云蒲東新建邵君堂烈
孝芳名四海揚鄉里喜傳碑上字聖朝遙下日邊章

我愛孤兒空戀世君憐幼女棄春光休緣生死分歧
視心事原來共一腔

同知楊木妻司氏夫早故遺子四庶子傑方在抱氏撫
如已出比閭咸稱賢母傑長每讀詩至蓼莪輒淚下
因作引罪流芳自責以揚母德

馬乘雲妻許氏年十八夫貿易卒淮上守撫庶子不啻
已出學使旌其門

國朝

李承惠妻劉氏夫亡撫四歲子榮基孝事舅姑鄉黨宗族間盡其禮節咸得懽心歲饑捐貲以賑貧乏雍正七年建坊旌表

監生李中堅妻劉氏年二十五夫亡事翁姑得其意旨教子讀書列成均守節五十四年雍正九年題請旌表

庠生武玓妻楊氏年十八夫亡矢志守節撫子成立史復祥妻潘氏武生史進母年二十九夫亡孝姑撫子

勤儉治家苦節三十餘年

賈堯信妻王氏年十五歸堯信十七堯信歿子梓甫四月族有利其財欲奪其志者百折不少挫梓娶婦久不乳或勸之置妾王曰我畢生孤苦天必不令絕嗣毋徒亂婦意已果得孫壽至九十七而終

石邦奇妻高氏年二十三而寡家酷貧衣食不給處人所不堪年九十有一

孫振興妻李氏舉人中馥孫女于歸數載振興卒子女

亦天年二十三上有老親家無擔石侍養垂三十年
邑令獎之

廩生雷元聲妻崔氏少寡守節四十三年子璿列邑庠
韓萬有妻王氏生有懿德少孀矢節訓二子胥讀書成
名邑令郃煥元作傳表之

生員雷化鳳妻石氏年二十八化鳳卒所親勸之改適
氏斥以大義苦節撫子壽八十九歲知縣郃煥元表
其閭

生員高騫妻李氏舉人李中馥女年十六適高越三載夫病危目注氏久而不瞑氏心知之泣曰我誓與君同穴也言訖瞑目絕時舅姑已歿遺夫弟毓祥甫六歲氏偕祖姑撫成之毓祥生子禮氏育為夫嗣鄉黨皆頌其賢

榆次縣

元

舉人格忠妻王氏年二十三歲忠亡誓不再適時豪貴

有求婚者氏曰吾為士人婦以孤幼不即死志未可奪也大德八年旌表

趙信妻李氏年二十夫歿遺子方晬撫育備至歷四十年大德十年旌表

康贊妻薄氏贊故家鮮餘貲躬紡績以養親克盡婦道延祐三年有司奏旌貞烈

張恭妻鄭氏少寡誓不再適食貧荼苦數十年不少變至順三年詔旌其門曰貞節

鄭和甫妻段氏年少夫卒家甚窘氏守義自矢終身如一
至正七年旌表

明

馬守道妻溫氏夫歿或以貧勸之更適泣拒曰生與吾
兒同處死與吾夫同穴雖即死不恤奚畏貧也志終
不易洪武十三年詔旌

趙旭妻周氏旭病篤氏焦勞絕粒及卒欲以死從家人
嚴伺之得免柏舟自矢操厲終身正德五年旌表

杜仲賢妻劉氏年二十仲賢卒有以他意諷之者氏曰
婦人夫死稱未亡人無再醮理卒完節以壽終

任整妻賈氏整役于京客死氏年二十三子幼宗黨欲
嫁之氏泣曰所不即死者以老母與孤也棄孤為不
慈背母為不孝滅慈與孝尚為人類耶久之夫櫬還
窆葬如禮孀居六十五年閭里高其節

郝氏郝能之女許聘鄭銓未婚而銓卒女聞之泣謂父
母曰業已許之矣不幸有此寧忍別適耶易服臨喪

事舅姑終身弘治九年旌表

賈濬妻劉氏年二十五而寡遺女二氏苦節不回卒年七十有七有司以聞

張景妻白氏通判白幹女年十六歸景景克虐侈縱蕩隕先業氏事之惟謹景歿苦節四十餘年歷久彌勵成化間請旌

賈昭妻趙氏有婦德相夫無忤年三十昭卒撫孤文斌成立孫珵領鄉薦咸謂趙氏之報云

寇讓妻冀氏年十九歸讓明年生子天錫甫三歲而讓卒父兄爭欲嫁之氏泣曰有藐孤在我行夫不祀矣誓死勿二苦節三十餘年有司以聞

張英妻侯氏醫官琳女年十七歸張十九生子瑤二十夫亡家人利其資產迫嫁不已氏泣曰吾夫棄世止存孤子我若適人則子亦流落吾夫之祀絕矣家人知志不可易遂奪其田產賣之氏曰吾夫之祀得存窮困可甘也視所奪略不為意里人欺其孤寡擾以

官役亦竭力支持不憚艱苦士夫聞者莫不敬羨
嘉靖間秦旌卒年八十有七光祿少卿周鐵撰墓誌
邑掾段廷相妻王氏廷相疾革顧謂氏曰汝年少將若
何氏曰志在從君無他道也廷相卒慟哭不食既葬
匍匐溺井姑救之益以守給守者出潛縊死于杼機
仲顯妻李氏固安教諭拙齋女髫年從父受讀大學論
語女訓諸書頗知大指歸仲勤儉整潔婦道允修事
舅姑尤篤于孝仲顯治商紀歷多出其手會嘉靖辛

丑秋八月邊報孔急李以夫兄命避王碧寨丙寅敵
果大至羣攻弗克丁卯再至戊辰寨破掠婦女百餘
北行及李李大罵曰安敢犯我遂從寨後投崖死見
光祿少卿周鐵集

郭思德妻安氏嘉靖二十年俺答部入境時關城未建
思德挈家走避寇猝至思德被害繫氏與二女行至
風雲雷雨壇西母女乘間赴井死兵退收屍瘞之仍
勒石於死所題曰一門三烈

李德麟妻武氏娶甫七月姑病醫藥罔効氏割股和羹食之病尋愈有司旌其孝

寇隅妻郭氏年少夫死無子女矢志孤燈敗幃卒不易操學使表其閭

生員李應期妻原氏年二十六夫卒上有兩世翁姑下遺四齡藐孤氏勤紡績以資事育課子香列庠序學使旌之

庠生寇一龍妻李氏順天府尹李敏女龍以事母憂勞

成疾卒氏年十五日夕號泣一志從夫遂飲毒而死
巡按洪奏請旌表

田仲傑妻郝氏年二十夫亡撫六歲子奎甫有成而卒
復撫七歲孫應科甫有成而又卒氏淚枯三世影弔
一身聞者咸為悼惜萬歷十一年給粟布旌之

生員鞏圖妻段氏年二十六夫亡遺子國基未週氏守
節三十餘年課國基讀書入泮潔白之操著於鄉閭
有司表之

生員王廷訓妻張氏年二十而寡矢志守貞節非大故足
不踰閭閻日唯御敝垢啖粗糲事翁姑甘旨不缺於
供壽六十六卒

庠生李春泰繼母馬氏閭變義不受汙罵賊投井死泰
姊李氏適王一元被執不屈受烙死

生員張翀妻侯氏太谷人甲申流寇猖獗携夫妻王氏
夫妹張氏避兵母家潛匿窰窰中賊薰掘甚烈氏知
不免先投井死母李氏弟妻任氏夫妾王氏夫妹張

氏暨婢妾輩十有三口胥從之詳見競烈篇

國朝順治間建坊旌表

生員閻永寧妻侯氏高翔妻郝氏舉人桂廷輔妻單氏
寇穆妻張氏范成宗妻胡氏白玉妻李氏王朝義妻
郝氏以上俱守志節

國朝

生員王之相妻姬氏年二十四而寡家道衰落衣食不
給或有微諷之者氏曰餓死事小失節事大厲聲斥

之發居六十載建坊旌表

生員李廉妻郭氏年十九夫亡守節撫孤清操允乎士
論子映桃為名諸生順治間請旌歲給粟帛壽八十
七終

李進選妻龐氏早媚惡少李正寅夜竊啟其門入逼之
氏峻拒指裂其膚負創而去雖晦冥中審為正音也
次日氏往詈罵李正反肆陵辱氏忿恚棄幼子投井
死康熙四十三年旌表

賈桂芳母郭氏年二十而寡心盟不渝八旬猶親織紡
知縣林堯華旌其門

姚定妻郭氏年十九夫亡上事病姑下撫幼子清操苦
行閭里憐之

鄭九鼎妻張氏年十九夫亡家窮甚有勸改適者氏曰
婦不可背夫母不忍棄子志終勿奪知縣金世正旌
其門

李映新妻張氏年二十三夫卒姑廢明朝夕侍左右行

必扶掖伺就枕然後即安夜則紡績以資養宵分不輟鄉里稱之

原建邦妻張氏年二十一歲夫亡守節撫孤歷五十二年卒

藥昌繼母胡氏于歸二載夫歿撫前子樹立荼藥以終知縣熊光裕旌其貞節

王國秀妻寇氏夫亡無子女子身守志歷四十餘年卒孝子張運通妻耿氏榆次令耿宗舜女字張張即隨父

任贛州道阻絕音問宗舜意張必別娶欲為改配女
不從貞守者數年後偵得張在宗舜招致之會張亦
失偶不遠數千里親迎焉于歸未幾夫故姑亦尋卒
氏竭蹶辦兩喪勤勞茹藥十有五年子女俱成以疾
卒

孫天德妻梁氏庠生李塘妻田氏許台衡母馬氏庠生
郭定民妻寇氏武舉段志奇母劉氏庠生李秉正妻
左氏韓接愈妻侯氏武生王偉業祖母李氏白運亨

妻張氏庠生何兆正妻馬氏武舉王太平妻李氏扶
風知縣寇知剛繼妻郭氏王珍妻侯氏白世奇妻王
氏武生王兆龍母魏氏庠生李曦妻桑氏郭卿字母
楊氏武生段輝妻楊氏王治妻齊氏郭養賢妻楊氏
庠生李國柱妻王氏張應奇妻任氏庠生施守輝母
張氏庠生韓玉妻趙氏子國松妻王氏以上俱守志
節

太谷縣

元

甘肅參政武旗妻王氏值變寇掠其家執氏欲污之罵
曰吾夫弱冠成名聲重士林吾寧死不為賊奴辱賊
以刃迫之罵益厲賊怒持刀斫之碎首而死

明

郭瓚妻郝氏年二十二瓚死夜縊于柩旁姑曹驚救之
泣勸曰我年半百遺孤在乳汝死將誰依氏省悟事
姑撫子孀居五十餘年正德三年事聞旌表

姬公輔妻常氏正德六年流寇入境被執氏曰我良家子義不受辱賊遂殺之時年二十二歲巡按杜昌請旌

趙烈女趙守貴次女年十六寇亂被獲犯之不從脅以刃不屈如故遂遇害巡按杜昌請旌

白思昂妻段氏生子斗甫兩月思昂卒氏年十八歲縊而救甦守節五十餘年御史宋表其門

舉人党繼經妻孟氏年二十三夫卒無子家貧一日不

再炊姑難其少且貧欲嫁之氏誓死無二志躬紡績以養姑壽八十三卒

舉人陳人道妾袁氏年二十九道歿無出偕嫡守志歷十五年嫡故杜門子處與一婢相依寂如也年七十餘卒巡按屢旌其門

生員崔鶴妻武氏年二十夫故子未期撫孤完節艱苦備嘗知縣申請旌之

牛孝女主簿牛斗女父病篤百藥不効氏割左臂肉療

之萬厯年知縣給扁旌異

李元芳妻員氏闖寇之變被執罵不絕口與夫元芳同

時遇害

庠生張孔教母孔氏孀居三十載遇變不屈罵賊死

侯化龍妻李氏甲申五月闖賊東敗走入村野刼掠氏

率其子婦任氏姪婦王氏趙氏已嫁女二室女三洎

諸婢妾十數人俱投井死士人競為詩歌以挽之

貢生胡衍虞母車氏闖賊攻城將破氏恐被辱欲雉經

侍兒十月者云垣外有廢井不如投之氏即禰衍虞
投井中會旱得不死十月出之井顧不知夫之所在
族人利其有諷使再適氏不應讓之田廬而未厭復
撓之氏卒不奪守節五十二年壽七十五而卒姑李
氏亦以節顯邑人杜可柱撰雙貞傳

段貴斌妻陳氏年二十三夫亡家徒壁立躬耕織以資
養育歷三十一載卒

趙乘龍妻杜氏生員吳桂妻杜氏生員趙奇俊母馬氏

閩寇陷城被執不屈胥罵賊而死

國朝

武舉牛一興妻杜氏翁病夫客遊醫藥罔效氏焚香祝天割股以進病旋愈邑令扁獎

楊柳春繼妻白氏牛斗暉妻成氏楊舟楫妻孔氏杜蔚州妻閩氏程崇嬰妻趙氏程生智母張氏程燦母趙氏以上俱守志節

祁縣

晉

魏氏王神念妻僧辨之母也性安和善於綏接家門內外莫不懷之梁元帝遣僧辨伐襄陽以待部曲下獄魏流涕徒行將入謝罪元帝不與相見時貞惠世子有寵魏詣閤自陳無訓誨涕泗嗚咽衆並矜之僧辨免罪魏深相責厲辭色俱嚴僧辨雖克復建鄴功盖宇宙魏恒自謙損不以富貴驕物朝野稱之謂為明哲婦人及卒命侍中謁者監護喪事謚曰貞敬太夫人

靈樞將歸建鄴又遣謁者至再弔祭

唐

王珪母李氏有知人之鑑謂珪曰我看汝當貴但不知
所與者何如耳一日房喬杜如晦造珪氏窺見大驚
敕具酒食盡歡既去謂珪曰二公皆公輔器子必與
之俱貴後卒如其言 杜甫送重表姪王砮評事使
南海詩曰我之曾祖姑爾之高祖母爾祖未顯時歸
為尚書婦隋朝大業末房杜俱交友長者來在門荒

年自糊口家貧無供給客位但箕帚俄頃羞頗珍寂
寥人散後入怪鬢髮空吁嗟為之久自陳剪髻鬢驚
市充杯酒上云天下亂宜與英俊厚向竊窺數公經
綸亦俱有次問最少年蚪髯十八九子等成大名皆
因此人手下云風雲合龍虎一吟吼願展丈夫雄得
辭兒女醜秦王時在坐真氣驚戶牖及乎貞觀初尚
書踐台斗夫人常肩輿上殿稱萬壽六宮師柔順法
則化妃后至尊均叔嫂盛事垂不朽

王氏太原人永福潘令之妻也隨夫宰永福任滿祖餞
留連王先解舟泊五里汰王灘下俟久不至月夜登
岼題詩壁曰何事潘郎戀別筵歡情未斷妾心懸汰
王灘下相思處猿叫空山月滿船末署太原族望歲
久詩漫滅獨太原二字入石邑人因以名其灘

明

生員孔俊妻武氏性淑慧每夜績佐夫讀偶問列女傳
俊曰爾婦人曷足語氏曰列女獨非婦人乎俊心奇

之正德辛未流賊入祁俊遇害逼氏氏罵曰吾儒家婦豈若等匹耶迎刃而死

楊子秀妻田氏夫亡守志賊入見其美欲犯之氏曰我正祈速死從夫地下爾豈為若等污耶斫傷其右臂絜衣走溺井死

趙文茂妻高氏避賊走空室中被執謂之曰從我當享安樂氏曰我無庸生奚庸安樂賊以及批其面并刺其腹死

王原妻郝氏早寡聞賊至衆皆走避郝獨不去及執厲聲曰我孀婦也不二心久矣賊見其不可屈揮刃碎其身而去

張才玘妻范氏賊變走伏坊民段能園舍賊突入范奮起捉衣嚙裾大罵之賊斫其頸殞地死

溫廷美妻郭氏賊至匿城下穴中賊搜得拽出迫之行溫知不免至城東深水坑奮身躍入死

段奎妻閻氏卧病不能起賊至奮聲大罵賊怒引弓揮

刀閭引頸迎之曰能速殺我我志遂矣賊竟殺之裂其屍

武禴妻楊氏年二十四而寡守節撫孤壽七十三卒

許琮妻呂氏年二十五夫亡事舅姑以孝聞子鴻程甫二歲課讀有成年十九領鄉薦

范奎妻王氏年二十二而寡遺子未期矢志撫孤壽七十有五卒

胡早妻李氏年二十一夫故方娠三月撫柩哭曰夫死

妾何忍獨生姑曰俟遺腹男女如何爾及期幸舉子
堅志撫孤壽七十三卒

顏亨妻何氏年二十三夫故遺女二有欲娶之者氏剪
髮自誓寧死不二撫女完節以壽終

任錫妻田氏性貞淑不妬忌孀居四十餘年撫庶孤如
已出閭里稱之

賈思本妻程氏年二十八思本卒氏事老育幼終始不
渝子璣娶王氏甫生子璣死王亦勵志如姑人稱賈

門雙節

溫士德妻渠氏家貧無子苦節四十餘載足不履戶外
紡績度日人無間言

郭孝禮妻劉氏年二十四夫亡子二義三歲智在娠卒
後七日而生守撫有成卒年八十

都事王應璧妻郝氏隆慶元年被賊掠迫之前行乘間
投井死

續文博妻范氏范儒女早歲訂婚未合蚤文博轉徙於

外二十年不返父母將改字女不從年四十文博還
始偕伉儷生男女各一鄉黨賢之

戴秋姐戴宛之女幼端謹有令德隆慶元年女年甫十
八隨母避賊行至秦村堡北賊突至先殺其母以刃
脅從女詈罵不屈怡然就戮賊怒裂其屍

袁銀旦袁永福之女年十六未字父母之田間女獨居
范遇興窺而逼之女詈叱不從遇興懼奔母歸訴其
故旋即自縊

楊士隆妻孟氏甲申流寇掠其家氏有姿容以甘言誘之不從脅以刃亦不屈夫與子俱被害氏罵曰死賊速殺我賊怒肢解之

王萬妻李氏呂廷與妻武氏閻朝榮妻申氏韓佩妻申氏監生康強妻田氏舉人王廷美妻袁氏范廷廣妻張氏郭伯羽妻王氏王慶妻張氏慶子王廷祿妻馮氏李廷直妻郭氏胡濂妻王氏王廷珍妻任氏庠生呂惟敬妻許氏武尚寬妻田氏驛丞胡應宿妻許氏

許安周妻申氏范思安妻呂氏武尚質妻陳氏李行
仁妻呂氏武定妻王氏生員許永慶妻續氏武尚學
妻康氏武安邦妻許氏以上俱守志節

國朝

武舉郝圻妻王氏年二十七夫故子三景鑰景鎭景鎬
俱幼氏守節教子景鑰景鎭列名庠序景鎬領武鄉
薦咸謂貞節之報康熙二十五年具疏旌表

廩生馬而豸妻程氏年二十三夫故無子誓不他適守

節五十餘年康熙二十七年具疏旌表

程二姐程爾潔女年十六父賈獲鹿與母杜及幼弟居
遇真觀道士馬陽旺覬女懷異志暮夜伏屋梁俟母
出潛下逼之女怒喊不從聲徹於外陽旺懼拔刀刺
之母聞驚愕急往燭之女已死陽旺度不免亦自刎
垂斃雍正三年建坊旌表

監生暢煥元妻程氏拔貢程大道女年二十九夫死痛
不欲生父諭之曰老姑幼子非汝安依意稍解奉姑

以孝謹聞撫子有成歷二十餘年辛勤罔懈雍正七年疏請旌表

生員申燦妻溫氏姜瓖之變夫婦俱被執賊殺燦挾溫上馬而去溫墮馬者三叫號怒罵遂遇害

任世秀妻許氏年二十一而寡家計蕭條氏撫諸幼事孀姑婦道母儀兩無所忝有司給扁表其門

徐溝縣

明

武志賢妻蘇氏年十九夫亡遺子甫一歲家貧紡績自給撫孤成立永樂三年旌表

王洪妻馮氏年二十歲夫亡矢志從死姑止之曰汝死孤何依氏泣而受命養姑撫子守節終身事聞旌表要碧妻楊氏年十八而寡子思欽妻亦早孀婦姑一節終始弗渝嘉靖間旌表

李贊妻申氏年十八夫亡姑以其年少使再嫁氏誓死不從撫幼子成立事聞旌表

張治妻閻氏年二十一夫亡撫孤守節歷四十餘年具
題旌表

郭琛妻董氏年十七生子甫期琛卒氏保孤矢志貞節
不移奏請旌表

張文風妻賈氏年十八夫故事姑以孝育子以慈鄉人
爭頌其節事聞旌表

蘇朝慶妻智氏年二十歲夫亡矢不二天以節壽終知
縣給扁旌獎

國朝

監生閻士弘妻劉氏年二十七士弘故晨夕悲號志期
死殉家人嚴衛之伺者偶疎一縑自縊去士弘之死
蓋未滿百日也

廩生閻士特妻馮氏幼嫻姆訓適閻生子榮甫五歲士
特卒瀕死者再姑以立孤勸氏毀容截髮曲承姑意
每語其孤曰幾時得見而公於地下苦守十年餘子
既長卒投井死

生員李呈錦妻任氏年十九夫亡苦守教子知縣高直
旌其門子和梅善承母訓補弟子員以孝行舉

郭翔鳳妻馮氏夫卒年纔十六身有娠越數月舉子貞
操自守撫之有成

張進履妻白氏常勤學妻王氏生員李塏妻馮氏常勤
妻王氏常思孔妻蘇氏生員常純妻趙氏郝儀妻李
氏趙進瑜妻張氏武生龍康泰妻閻氏杜池妻李氏
喬標妻王氏陳獻堂妻任氏以上俱守志節

清源縣

明

韓定妻張氏夫故具棺衾營窆旋為子娶婦訖從容就縊事聞旌表

生員成臯謨妻馬氏年二十夫亡矢殉乘間就縊家人救之甦徐曰我志已決若等徒苦我也越月復飲毒死

生員劉祚隆妻王氏值流賊逼城下氏聞偕婢投井死

巡按題請旌表

鴻臚寺序班牛芝妻王氏年二十芝亡子兆奎兆正尚在抱氏苦志撫孤誦讀皆其口授二子學成胥為諸生壽至八十餘歲

侯景新妻王氏何瑀妻梁氏牛載妻段氏羅俊民妻張氏以上俱守志節

國朝

羅宇資妻高氏年十八夫卒子紘甫八月父母難之氏

曰守適各惟其志雖少何慮自是苦節自持終身鰥
素課子讀書游庠壽七十五卒

牛瀛漢妻梁氏早寡家貧矢志守節年七十七歲卒

何其偉妻米氏年十七適其偉閱三載其偉卒氏事親
育幼曲盡其道節操歷久彌堅邑令扁旌

牛履泰妻李氏年二十七夫亡矢志守節撫二子胥成
邑令旌之

郭運妻王氏年二十五夫亡撫六月孤廷榮茹荼守志

內外高其節

生員高聯芳妻劉氏生員王膺祚妻秦氏生員羅登雲妻王氏以上俱守志節

交城縣

明

蘇子良妻胡氏年十七適子良子良卒守節六十七歲
萬歷間旌表

任弼妻呂氏年十九甫生子弼卒孀居守節卒年七十

有八當事旌之

楊希儒妻王氏希儒早亡無出有庶子富家求娶氏泣
曰母老子幼伊誰之責吾終為楊氏鬼耳有司聞而
旌之

生員韓宗周妻孫氏年十九宗周卒撫孤偉成娶婦劉
氏不數年偉又卒姑婦砥節孫年八十有四劉年八
十有六胥以壽終

史萬莊妻張氏年十九萬莊歿家人欲奪其志氏矢死

不變守節五十三年壽七十有四萬厯間當道表之
韓宗信妻翟氏年二十夫亡誓與俱死晚自縊救甦越
七日卒縊死巡按宋公旌其門

聶三妻曹氏天啟初山賊嘯掠氏年二十三被執欲污
之給以他辭得間自經大參王公作誄刻石于演武
場

惠貞旺妻安氏流寇亂夫被殺氏年十九生女甫三月
翁姑將避亂以攜少婦有難色欲使更適氏聞啼哭

終日至夜卧女於牀潛出縊死於龍王廟

國朝

庠生康功妻陳氏年二十六夫亡事姑盡孝撫二子讀書成立守節四十餘年雍正八年疏請旌表

生員李成秀妻韓氏年二十二歲成秀亡食貧守節年七十有一卒子法邑廩生

丁珣之妻楊氏年二十一歲珣之亡苦志守節窮約不變年七十六卒

解應乾妻常氏幼讀女孝經列女傳適應乾五載而寡
子文光在襁褓戚屬勸之改醮氏怒斥之終其身簪
珥不飾荼蘼自甘年七十有一卒

郭倫新妻王氏夫卒家貧食粗糲衣敗絮志不少變年
八十卒

單可仕妻張氏年十七夫亡孀居六十六年壽八十有
二卒

解文煥妻張氏夫卒子復夭或勸之再適氏厲色拒之

全節以終

解鋌妻連氏年二十四鋌亡遺孤之精撫之成立之精妻楊氏復早寡遺孫文燦方在抱楊亦矢志撫孤無忝姑範云

孫氏李珮妻曹氏李環妻俱市東廂人時西山盜起妯娌戒弗辱賊至相繼投井賊強出之二氏詈罵奮躍而入賊怒壓以大石而去

白象鈿妻胡氏年二十其姑與夫並長子同日而亡家

貧如洗氏拮据治殮畢飲冰茹蘗歷三十餘年撫次子振新食餽于庠學使鄒士璉獎之曰苦節流芳

邢立極妻武氏年二十二夫亡志行迄老如初性好施予敦睦鄉黨鄉人稱之不置

徐節妻王氏生子雲臺甫四月節出遊久而不返氏織絁度日備歷艱辛里婦憐之諷曰饑寒死荒野誰為知者氏失聲曰是欲禽獸我耶遂與之絕後節卒客死招魂以葬哭泣盡哀不愧為節云

梁啟魏妻張氏年二十三夫卒未幾孤復殤所親諷之
嫁氏泣曰夫亡子夭命綦薄矣寧復失節耶勤勞孤
苦卒奉姑以終老

任作鼎妻覃氏年二十四夫歿撫子娶婦子尋卒復撫
幼孫苦節數十年而卒

李玉姐李發之女幼字閻環奇環奇出亡不返年及笄
父母將改字女聞飲泣不食闔戶自縊

庠生游漢儒妻任氏李經方妻張氏張鳳虎妻閻氏衛

之屏妻許氏郭傑妻閻氏覃成象妻楊氏張爾抱妻
胡氏監生呂暹妻曹氏蘇若轍妻孫氏庠生丁作舟
妻田氏庠生陳大典妻孟氏田福妻李氏武生白珩
妻劉氏庠生丁作彥妻張氏生員田鍾奇妻胡氏曹
臣母王氏以上俱守志節

文水縣

唐

李景讓母鄭氏早寡治家嚴身訓諸子始貧乏時治牆

得積錢僮婢奔告母曰士不勤而祿猶蓄其身況無
妄而得我何取亟使閉坎景讓自右散騎常侍出為
浙西觀察使母問行日讓率然對有日鄭曰如是吾
方有事未及行蓋怒其不嘗告也且曰已貴何庸母
行景讓重請臯乃赦故雖老猶加箠敕已起欣欣如
初嘗怒牙將杖殺之軍且謀變母召景讓廷責曰爾
鎮撫方面而輕用刑一夫不寧豈特上負天子亦使
百歲母銜羞泉下何面目見先大夫乎將鞭其背羣

吏大將再拜請不許皆泣謝迺罷一軍遂定景讓家
行修治閨帷謹皆母教也

明

霍文聚妻呂氏年二十五夫故守節四十餘年奏請旌
表

李山妻常氏早寡守節終身不變奉旌

李儉妻韓氏年二十一夫亡守節撫孤當道旌表

王信妻張氏年二十一夫故遺子以文尚幼氏紡織自

給撫子成立孀居六十餘年

李堅妻郭氏年二十孀居誓不改醮撫育幼子年七十
六卒

孟進妻李氏年十九夫卒遺子甫一歲氏矢志不二苦
節歿身

李美妻武氏年二十四夫故遺子應春在襁褓氏撫訓
有成列邑庠鄉黨咸高其節

郭澤妻索氏夫故觸棺欲殉家人防之得不死撫遺腹

子卒復撫遺孫兩世孤雛盡成其手守節五十五年
壽七十九歲建坊旌表

郭樂妻王氏舉人王一爵女幼嗜讀女孝經頗通字義
年二十守寡育幼孤事翁姑八十而終邑令馬斯和
申請旌表

李廷妻武氏蘇統妻李氏庠生閻艾妻馬氏張翼明妻
王氏以上俱守志節

國朝

生員王經世母孟氏少寡苦節建坊旌表

庠生郭基隆妻李氏年二十夫亡子如陵如岡俱在抱
矢志撫孤歷四十餘年雍正八年疏請旌表

李樓妻楊氏早寡撫子子亡撫孫苦節六十載享年八
十餘

舉人郭超宗妻文氏賊至氏恐被辱投井死邑令劉乃
桂旌曰清泉烈節

郭夢周妻侯氏夢周早亡氏年十七歲遺孤未週誓死

不嫁守節以終

席釁列妻賀氏年十九而寡事親撫孤守志以終

侯晏妻孟氏年二十夫亡孀居六十餘載終始一節當
道扁旌

光祿寺署丞王用中妻張氏用中早逝遺孤岱方四歲
稍長嚴課讀卒以文名守節四十餘年迄如一日

武纘妻侯氏年十八生子甫八月纘逝家貧苦守壽九
十卒

姚永寧妻張氏夫亡與姑鄭氏孀居二十餘年承歡無間

生員任權妻王氏武懋德妻楊氏蔚三命妻權氏張銘妻成氏監生曹珫妻成氏庠生王岱妻任氏庠生田景行妻周氏侯樂天妻李氏田暉妻武氏楊占春妻陳氏以上俱守志節

岢嵐州

宋

楊業妻折氏業初名劉繼業事北漢任建為節度使娶折德扆女後歸宋賜姓楊折性敏慧嘗佐業立戰功號楊無敵後業戰死于陳家谷潘美王侁畏罪欲掩其事折上疏辨夫力戰獲死之由遂削潘美王侁除名

王稟妻孟氏稟府州人娶寄嵐孟氏稟後為太原總管金尼瑪哈陷太原稟力戰知不可為負太祖像死汾水中孟曰妻以夫為天夫死我寧有生理亦投水死

明

生員張大紀妻徐氏妾武氏嘉靖間北部入境被掠迫以行大紀墜崖死徐氏繼之武氏擲幼兒崖下給兵下馬拉俱與墜死

武勛聘妻王烈姐年十七未婚寇亂被獲厲罵不從賊怒斫之裂其屍

康弘業妻葛氏年十六適弘業越三載弘業病不起頻目葛葛曰得毋疑我有他志耶泣而斷髮夫卒不食

者三日比葬屢哭于墓所投繯自經

生員李厚幣妻張氏少寡矢志不二訓子春艷為諸生
未幾春艷復夭撫孫自強成茂才年八十乃歿

賈東周妻潘氏東周死於寇氏終日哀泣慰諭莫解卒
以悲死

牛惠妻許氏惠死於兵子斗山復夭折鞠育孫曾嚴訓
誨胥為邑諸生年九十有一卒巡按旌之

生員王定妻李氏年二十三定卒子納諫未踰歲家甚

寔矢守課子納諫稍不若輒泣讓之諫餽于庠尋卒
訓孫道成成名年九十三卒題請旌表

生員陸登驩妻王氏登驩患足癰醫藥罔效氏為吮之
卒不起夫死王亦死

郭漸妻呂氏年十六適漸歲餘漸沒呂哭不輟聲數月
哀毀而亡

生員秦知章妻何氏張鵬妻吳氏張大整妻王氏常懷
卿妻岳氏明經王道新妻梁氏生員王三樂妻姚氏

賈振妻袁氏生員李灼妻賈氏俱守志節

國朝

張朝妻白氏年十七適朝越十一載朝卒家貧親黨難
其守氏矢志冰霜養老畜幼苦節三十二年雍正八
年疏請旌表

郭命弘妻李氏強暴張榮逼污不從被害康熙五十三
年建坊旌表

李元詩妻閻氏早寡撫遺腹子士選耕讀兼課歷七十

餘年勤勞罔懈子列庠

生員油棟皇妻張氏年二十餘夫亡食貧撫子壽八十

餘卒

嵐縣

明

溫鐸妻趙氏子志端甫一歲鐸卒服闋舅姑將奪而嫁之氏剪髮自矢卒撫孤遂志正德十三年題旌

李存信妻梁氏年十八夫卒生子世芳甫數月守節撫

孤貞操允著

庠生馮繼妻溫氏年十八而寡撫兩月遺孤克成家業

人爭頌之

張爵祿妻馮氏年二十二夫亡撫幼子事舅姑隣婦有
勸再醮者面斥逐之婦慚愧而去

靳鐸妻郭氏年十七夫亡子甫兩月氏辛勤撫育卒能
有成

李尚約妻范氏生子元南未期氏年十九尚約卒痛哭

幾絕貧窶無依歷困苦無變志有司聞而獎之

李祿妻溫氏年二十祿亡無舅姑子女之依孀獨一身
淒涼守志年七十而卒

李孟和妻尹氏年十九夫亡撫柩悲號晝夜不絕聲既
葬謹守一室寸步不踰苦節六十餘載有司扁旌其
門

郭登高妻袁氏嫁甫四月登高卒氏年十七誓不二天
巡按宋給扁旌節

庠生郭登科妻張氏早寡事孀姑撫幼子以貞節終子
光列邑庠

范浩妻劉氏年十九浩亡苦節六十餘載卒

李璋繼妻袁氏璋卒家貧甚子五前妻出者二氏出者
三撫前妻子無異己子勤課讀胥得成名氏子廷相
以孝聞邑令嘉其母貞子孝特加獎勵

王經妻田氏年二十五經卒子幼舅姑伯叔欲奪其志
氏堅貞自守歷四十餘年百折不渝

劉聖基妻李氏年二十三夫亡氏念劉氏五世單傳藐孤係重撫三歲子錫普有成孫枝寢熾鄉黨賢之

國朝

郎廷瑋妻牛氏年二十五廷瑋病篤謂氏曰老母幼弟弱子惟汝是囑氏涕泣承命廷瑋卒孝養孀姑撫夫弟暨子胥成立雍正八年旌表

武維英妻馮氏年二十五夫亡奉姑撫子夫兄漂泊迎養之夫弟客死歸葬之鞠育孤姪迄於授室閭里咸

稱賢節雍正八年旌表

興縣

明

李氏羅峪溝村李君璵之姑適呂君璵父巨富而君璵驕縱蕩其產幾盡父將死密出二千金付其姑曰子不肖後當死溝中汝持此去子改行付之不改則與甥母為他人所誘蕩也姑泣而受之密藏於近村樹下不令其夫與子知璵父死數年益落魄姑數賙之

以語激者再璵愧悔交并姑見其意識乃曰隨我來
至樹下發得金璵愕曰此何也姑曰此爾父終時所
囑濟爾命者也璵感泣獻其半姑曰我欲有之則全
有矣奚以半為亟持去璵歸自刻厲復致富姑死為
成服

劉紹志妻白氏年十五歸紹志越三年紹志病憂勞廢
寢食紹志窺之顧謂氏曰即我不幸死汝其從我乎
氏泣曰顧予不忍言萬一不諱妾豈獨生紹志卒慟

哭時覓死家人防衛至周氏乃佯解顏伺者漸弛密置斂衣于樓上因假他事登樓即自縊比覺已絕矣時年十七歲知縣王完為立傳

高宗禮妻郭氏年二十一夫卒越二月遺腹生子親老家貧誓不再醮守節五十六年壽七十有八

賀冕妻白氏年二十二生子永寧方一歲冕卒氏食貧撫孤卒年七十有七

關文勝妻劉氏年二十四夫亡遺腹生子奉養孀姑賀

氏撫孤成立年七十八卒

吳昇妻田氏生一子夫卒隣婦憐其少勸之嫁氏怒曰
命可棄身不可汚舅姑義之卒成其志

甄泰妻康氏泰病危呼氏曰親老子幼奈何氏泣而身
任之泰卒奉親撫子一一不違夫命

王璲妻齊氏年二十八璲卒縊於屍傍巡按李立貞婦
坊以旌之

生員樊瓚妻劉氏年二十四瓚卒子安仁在襁褓氏守

節訓子列明經任秦州判官嘉靖間請旌

張子建妻李氏夫卒遺孤朝義方在娠既生撫甫成尋
亦卒又撫二孫以老巡按李旌其貞節

白能妻趙氏能卒子幼氏甘貧守志誓不改節年七十
卒

胡天祿妻孫氏年二十三夫卒無子矢志自守撫義子
存夫祀年七十而終

劉政妻樊氏年二十一夫卒兄欲奪其志氏攜子訟官

全節以終

王鸞妻賀氏年十九夫卒自縊以殉巡按桂旌其門

吳良能妻陳氏年二十三夫亡誓殉潛縊於柩側巡按

桂旌之

張昇妻白氏方娠夫亡已而舉子家貧身親耕稼以自

食年六十三卒

田紹先妻李氏夫亡年二十四歲同姑守節撫遺孤年

七十六卒

康所里妻孫氏生員孫世祥女為賊所掠逼污之不從
罵賊求死賊不加刃挾以俱去至黃河坼投水死

生員劉文妻樊氏流寇肆掠被執義不受辱墜懸崖死
康衛民妻孫氏年十八夫亡遺女一氏誓不再適守節
歷四十餘年

孫仲禮妻陶氏張志端妻毛氏康尹妻王氏劉能妻張
氏李慶生妻田氏張玉寶妻樊氏張玉珮妻王氏俱
守志節

國朝

劉文衡妻孫氏年二十八夫亡撫子守節四十餘年卒
庠生原見田妻劉氏年二十九夫亡子幼家貧柏舟矢
節年八十二卒

廩生白居易妻杜氏年二十六而寡子鰥甫七歲課子
成立凡四十年而卒

生員劉牲妻孫氏年二十四舅與夫繼歿未幾姑與子
又亡含辛獨守凡六十年卒

王氏曹啞子母早寡子廢疾鄰婦王氏亦寡約與俱守
已歷十五載一日氏偶適外戚或奔告曰王氏改嫁
矣氏驚曰信有之乎曰目所親見也氏乃撫膺大慟
曰不意醜婦竟作此事遂氣憤而絕

白迎祥妻王氏迎祥善騎射隨陝鎮征茅籠山沒氏年
二十八姑老子幼氏力作以贍事育年七十有一卒
縣令旌其門曰幽貞可範

康文彪妻田氏年二十一文彪卒家貧女紅自給撫子

齡松並撫五歲之姪由成三歲之甥孫康國皆蘄然
成立歸承宗祀氏一女流而三姓之宗祧以賴鄉黨
賢之

王授基妻康氏年十九授基歿遺腹生子立閱十餘載
為締姻畢乃會親族率立哭奠於授基墓衆莫之解
氏歸即自縊時年三十有二

孫雲璫妻白氏年十四適雲璫二十七雲璫亡氏辛勤
撫子容慘不舒姑嫜問之曰吾未亡人事也越二十

載子長娶婦氏攜之拜奠雲膜墓指而告曰此君子也吾為撫之此君媳也吾為娶之吾事已畢可以從君矣一號仆墓而絕

康如珍妻白氏年三十無子如琰妻賀氏年三十一無子各撫一姪守志二孤寒室胥食餽于庠

孫士熊妻王氏年二十九夫亡子甫二歲家人欲奪其志氏慟曰與其捨子而去不若從夫而死卒不能移年六十終

喬之珩妻康氏年二十一夫卒踰年一子亦卒翁患癰
姑失明氏奉養惟謹浚溺皆手自除之翁姑沒子身

守志

康氏舉人康體元女少字庠生劉玘子士麒將婚而士
麒癩久益甚玘與體元議解盟氏聞矢死體元喜曰
苟能如是吾成汝志年十九歸劉善事舅姑調護士
麒衣食備至歷四十年士麒死氏依然處女也會士
麒弟士麟先麒卒無子氏撫從姪承曾以繼翁祀邑

令商基鏞旌其門

劉光榮妻王氏歷事三姑克盡孝道夫弟光世生五日而姑卒氏親撫之不育而乳光世善病七歲不釋懷稍長勤女紅以佐學一堂雍睦從無間言

庠生喬國英妻劉氏生員劉鉉妻崔氏尹克忠妻孫氏孟開統妻郭氏樊述聖妻孫氏以上俱守志節

山西通志卷一百四十九